



歷代名賢列女姓氏譜卷之十

湘鄉

蕭智漢雲澤氏纂輯

男秉信明甫氏校

上平聲

徵

徵氏

子姓宋徵仲之後

歷代名賢

周

徵彪魯大夫亦作晉大夫

章氏

出自風姓亦曰豕韋氏杜預云彭商之伯國今滑州韋城卽其地能豢龍故韋城古城內有豢龍井尙存按唐宰相世系表云顓頊孫大彭爲夏諸侯少康之世封其

氏姓譜

卷十

五徵

徵氏

一

別孫元哲于豕韋迭爲商伯周赧王時始失國徙居彭城以國爲氏然元哲之名無所經見春秋時自無韋國何得至赧王也韋伯遐二十四世孫孟爲漢楚王傳去位徙居魯國鄒縣孟四世孫賢漢丞相扶陽節侯又徙京兆杜陵生元成丞相生寬寬生育育生浚後漢尙書令生豹梓潼太守生著東海相孫胄魏詹事安城侯三子潛穆愔潛號西眷穆號東眷潛曾孫惠度後魏中書侍郎生千雄路陽太守生鄭子字英代郡守兗州刺史生璵字世珍後周侍中平齊惠公號平齊公房二子峻師又按韋氏定著九房一曰西眷二曰東眷三曰逍遙公房四曰鄆公房五曰南皮公房六曰駙馬房七曰龍門公房八曰小逍遙公房九曰京兆平齊公房有保衡宏敏其後也東眷有方質其後也逍遙公房有貫之處

厚待價其後也鄆公房有巨源其後也南皮公房有見
素其後也駙馬房有溫其後也龍門公房有執誼其後
也襄陽有思謙嗣立其後也京兆有貽範昭度其後也

歷代名賢

漢

韋賢字長孺魯國鄒人也其先韋孟家本彭城爲楚元王
傅傅子夷王及孫王戊戌荒淫不遵道孟作詩風諫後遂
去位徙家于鄒又作一詩以諫曰肅肅我祖國自豕韋黼
衣朱紱四牡龍旂彤弓斯征撫寧遐荒總齊羣邦以翼大
商迭彼大彭勳績惟光至于有周歷世會同王赧聽譖實
絕我邦我邦旣絕厥政斯逸賞罰之行非繇王室庶尹羣
后靡扶靡衛五服崩離宗周以隊我祖斯微遷于彭城在
予小子勤諛厥生昵此媿秦耒耜以耕悠悠媿秦上天不

氏姓譜

卷十

五微

韋氏

一

寧迺眷南顧授漢于京於赫有漢四方是征靡適不懷萬
國匱平迺命厥弟建侯于楚俾我小臣惟傳是輔兢兢元
王恭儉淨壹惠此黎民納彼輔弼饗國漸世垂烈于後迺
及夷王克奉厥緒咨命不永惟王統祀左右陪臣此惟皇
士如何我王不思守保不惟履冰以繼祖考邦事是廢逸
游是娛犬馬繇繇是放是驅務彼鳥獸忽此稼苗烝民以
匱我王以媮所宏非德所親非俊惟罔是恢惟諛是信喻
諭諂夫喞喞黃髮如何我王曾不是察旣藐下臣追欲從
逸媿彼顯祖輕茲削黜嗟嗟我王漢之睦親曾不夙夜以
休令聞穆穆天子臨爾下土明明羣司執憲靡顧正遐繇
近殆其怙茲嗟嗟我王曷不此思非思非鑒嗣其罔則彌
彌其失岌岌其國致冰匪霜致隊靡媿瞻惟我王昔靡不
練典國救顛孰違悔過追思黃髮秦繆以霸歲月其徂年

其遠考於昔君子庶顯于後我王如何曾不斯覽黃髮不
近朝不時監其在鄒詩曰微微小子既耆且陋豈不率位
穢我王朝王朝肅清惟俊之庭顧瞻余躬懼穢此征我之
退征請于天子天子我恤矜我髮齒赫赫天子明哲且仁
懸車之義以洎小臣嗟我小子豈不懷土庶我王寤越遷
于魯既去禍祖惟懷惟顧祁祁我徒戴負盈路爰戾于鄒
鬢茅作堂我徒我環築室于墻我既遷逝心存我舊夢我
瀆上立于王朝其夢如何夢爭王室其爭如何夢王我弱
寤其外邦歎其喟然念我祖考泣涕其漣微微老夫咨既
遷絕洋洋仲尼視我遺烈濟濟鄒魯禮義惟恭誦習弦歌
于異他邦我雖鄙考心其好而我徒侃爾樂亦在而孟卒
于鄒或曰其子孫好事述先人之志而作是詩也自孟至
賢五世賢爲人質朴少欲篤志于學兼通禮尚書以詩教

氏姓譜

卷十

五徵

韋氏

三

授號稱鄒魯大儒徵爲博士給事中進授昭帝詩稍遷光
祿大夫詹事至大鴻臚昭帝崩無嗣大將軍霍光與公卿
共尊立孝宣帝帝初卽位賢以與謀議安宗廟賜爵關內
侯食邑徙爲長信少府以先帝師甚見尊重本始三年代
蔡義爲丞相封扶陽侯食邑七百戶時賢七十餘爲相五
歲地節三年以老病乞骸骨賜黃金百斤罷歸加賜第一
區丞相致仕自賢始年八十二薨諡曰節侯賢四子長子
方山爲高寢令早終次子宏至東海太守次子舜留魯守
墳墓少子元成復以明經歷位至丞相故鄒魯諺曰遺子
黃金滿籬不如一經

韋元成字少翁以父任爲郎常侍騎少好學修父業尤謙
遜下士出遇知識步行輒下從者與載送之以爲常其接
人貧賤者益加敬由是名譽日廣以明經擢爲諫大夫遷

大河都尉初元成兄宏爲太常丞職奉宗廟典諸陵邑頌
劇多罪過父賢以宏當爲嗣故赦令自免宏懷謙不去官
及賢病篤宏竟坐宗廟事繫獄罪未決室家問賢當爲後
者賢悲恨不肯言于是賢門下生博士義倩等與宗家計
議共矯賢令使家丞上書言大行以大河都尉元成爲後
賢薨元成在官聞喪又言當爲嗣元成深知其非賢雅意
卽陽爲病狂卧便利妄笑語昏亂徵至長安旣葬當襲爵
以病狂不應名大鴻臚奉狀章下丞相御史案驗元成素
有各聲士大夫多疑其欲讓爵辟兄者案事丞相史乃與
元成書曰古之辭讓必有文義可觀故能垂榮于後今子
獨壞容貌蒙恥辱爲狂癡光曜掩而不宣微哉子之所託
名也僕素愚陋過爲宰相執事願少聞風聲不然恐子傷
高而僕爲小人也元成友人侍郎章亦上疏言聖王貴以

氏姓譜

卷十

五微 韋氏

四

禮讓爲國宜優養元成勿枉其志使得自安衡門之下而
丞相御史遂以元成實不病劾奏之有詔勿劾引拜元成
不得已受爵宣帝高其節以元成爲河南太守兄宏太山
都尉遷東海太守數歲元成徵爲未央衛尉遷太常坐與
故平通侯楊惲厚善惲誅黨友皆免官後以列侯侍祀孝
惠廟當晨入廟天雨淖不駕駟馬車而騎至廟下有司劾
奏等輩數人皆削爵爲鬪內侯元成自傷貶黜父爵歎曰
吾何面目以奉祭祀作詩自劾責初宣帝寵姬張婕妤男
淮陽憲王好政事通法律上奇其材有意欲以爲嗣然用
太子起于細微又早失母故不忍也久之上欲感風憲王
輔以禮讓之臣乃名拜元成爲淮陽中尉是時王未就國
元成受詔與太子太傅蕭望之及五經諸儒雜論同異于
石渠閣條奏其對及元帝卽位以元成爲少府遷太子太

傳至御史大夫永光中代于定國爲丞相貶黜十年之間
遂繼父相位封侯故國榮當世焉元成復作詩自著復玷
缺之難因以戒示子孫曰於肅君子旣令厥德儀服此
恭棣棣其則咨余小子旣德靡逮曾是車服荒嫚以隊明
明天子俊德烈烈不遂我遺恤我九列我旣茲恤惟風惟
夜畏忌是申供事靡惰天子我監登我三事顧我傷隊爵
復我舊我旣此登望我舊階先后茲度漣漣孔懷司直御
事我熙我盛羣公百僚我嘉我慶于異卿士非同我心三
事惟藉莫我肯矜赫赫三事力雖此畢非吾所度退其罔
日昔我之隊畏不此居今我度茲戚戚其懼嗟我後人命
其靡常靖享爾位瞻仰靡荒慎爾會同戒爾車服無媚爾
儀以保爾域爾無我視不慎不整我之此復惟祿之幸於
戲後人惟肅惟栗無忝顯祖以藩漢室元成爲相七年守

氏姓譜

卷十

五徵

韋氏

五

正持重不及父賢而文采過之建昭三年薨諡曰共侯
韋彪字孟達扶風平陵人也高祖賢宣帝時爲丞相祖賞
哀帝時爲大司馬彪孝行純至父母卒哀毀三年不出廬
寢服竟羸瘠骨立異形醫療數年乃起好學洽聞雅稱儒
宗建武末舉孝廉除郎中以病免復歸教授安貧樂道恬
于進趣三輔諸儒莫不慕仰之顯宗聞彪名永平六年召
拜謁者賜以車馬衣服三遷魏郡太守肅宗卽位以病免
徵爲左中郎將長樂衛尉數陳政術每歸寬厚比上疏乞
骸骨毋爲奉車都尉秩中二千石賞賜恩寵侔于親戚建
初七年車駕西巡狩以彪行太常從數名入問以三輔舊
事禮儀風俗彪因建言今四巡舊都宜追錄高祖中宗功
臣褒顯先勲紀其子孫帝納之行至長安乃制詔京兆尹
右扶風求蕭何霍光後時光無苗裔惟封何末孫熊爲鄠

侯建初二年已封曹參後曹湛爲平陽侯故不復及焉乃厚賜彪錢珍羞食物使歸平陵上冢還拜大鴻臚是時陳事者多言郡國貢舉率非功次故守職益懈而吏事寢疏咎在州郡有詔下公卿朝臣議彪上議曰士宜以才行爲先不可純以閥閱然其要歸在于選二千石二千石賢則貢舉皆得其人帝深納之彪以世承二帝吏化之後多以苛刻爲能又置官選職不必以才因盛夏多寒上疏諫帝納之元和二年春東巡狩以彪行司徒事從行還以病乞身帝遣小黃門太醫問病賜以食物彪遂稱困篤章和二年夏使謁者策詔曰彪以將相之裔勤身飭行出自州里在位歷載中被篤疾連上求退君年在耆艾不可復以加增恐職事煩碎重有損焉其上大鴻臚卽綬其遣太子舍人詣中臧府受賜錢二十萬永元元年卒詔尙書故大鴻

氏姓譜

卷十

五徵

韋氏

六

臚韋彪在位無愆方欲錄用奄忽而卒其賜錢二十萬布百匹穀三十斛彪清儉好施祿賜分與宗族家無餘財著書十二篇號曰韋卿子族子義義字季節高祖父元成元帝時爲丞相初彪獨徙扶風故義猶爲京兆杜陵人焉兄順字叔文平輿令有高名次兄豹字季明數辟公府輒以事去司徒劉愷復辟之謂曰卿以輕好去就爵位不躋今歲垂盡當選御史意在相薦子其宿留乎豹曰犬馬齒衰旅力已劣仰慕崇恩故未能自割且眩瞽滯疾不堪久待選薦之私非所敢當遂跣而起愷追之徑去不顧安帝西巡徵辟議郎義少與二兄齊名初任州郡太傅桓焉辟舉理劇爲廣都長甘陵陳二縣令政甚有績官曹無事牢獄空虛數上書順帝陳宜依古典考功黜陟徵集名儒大定其制又譏切左右貶刺竇氏言既無感而久抑不遷以兄

順喪去官比辟公府不就廣都爲生立廟及卒三縣吏民爲義舉哀若喪考妣豹子著字休明少以經行知名不應州郡之命大將軍梁冀辟不就延熹二年桓帝公車備禮徵至霸陵稱病歸乃入雲陽山採藥不反有司舉奏加罪帝特原之復詔京兆尹重以禮敦勸著遂不就徵靈帝卽位中常侍曹節以陳蕃竇武旣誅海內多怨欲借罷時賢以爲名白帝就家拜著東海相詔書逼切不得已解巾之

郡

章端二子長元將次仲將孔融與端書云不意兩珠近出老蚌前日元將來淵才亮茂雅度宏毅經世之器也昨日仲將來文敏篤誠保家之主也

三國

韋曜字宏嗣吳郡雲陽人也少好學能屬文從丞相掾除

氏姓譜

卷十

五微

韋氏

七

西安令還爲尙書郎遷太子中庶子時蔡潁亦在東宮性好博奕太子和以爲無益命曜論之和廢後爲黃門侍郎孫亮卽位諸葛恪輔政表曜爲太史令撰吳書華覈薛瑩等皆與參同孫休踐阼爲中書郎博士祭酒命曜依劉向故事校定衆書又欲延曜侍講而左將軍張布近習寵幸事行多玷憚曜侍講儒士又性精確懼以古今警戒休意固爭不可休深恨布然曜竟止不入孫皓卽位封高陵亭侯遷中書僕射職省爲侍中常領左國史時在所承指數言瑞應皓以問曜曜答曰此人家筐篋中物耳又皓欲爲父和作紀曜執以和不登帝位宜名爲傳如是者非一漸見責怒曜益憂懼自陳衰老求去侍史二官乞欲成所造書以後業別有所付皓終不聽時有疾病醫藥監護持之愈急皓每饗宴無不竟日坐席無能否率以七升爲限雖

不悉入口皆澆灌取盡曜素飲酒不過三升初見禮異時常爲裁減或密賜茶苑以當酒至于寵衰更見偏彊輒以爲罪又于酒後使侍臣難折公卿以嚙弄侵克發摘私短以爲歡時有愆過或誤犯皓諱輒見收縛至于誅戮曜以爲外相毀傷內長尤恨使不濟濟非佳事也故但示難問經義言論而已皓以爲不承用詔命意不忠蓋遂積前後嫌忿收曜付獄是歲鳳皇二年也曜因獄吏上辭曰囚荷恩見哀無與爲比曾無芒菴有以上報孤辱恩寵自陷極罪念當灰滅長棄黃泉愚情悽悽竊有所懷貪令上聞囚昔見世間有古歷注其所紀載紀多虛無在書籍者亦復錯謬四尋按傳記考合異同采撫耳目所及以作洞紀起自庖犧至于秦漢凡爲三卷當起黃武以來別作一卷事尙未成又見劉熙所作釋名信多佳者然物類衆多難得

氏姓譜

卷十

五徵

韋氏

八

詳究故時有得失而爵位之事又有非是愚以官爵今之所急不宜乖誤囚自志至微又作官職訓及辨釋名各一卷欲表上之新寫始畢會以無狀幽囚待命泯沒之日恨不上聞謹以先死列狀乞上言秘府于外料取呈內以聞追懼淺蔽不合天聽抱怖雀息乞垂哀省曜冀以此求免而皓更怪其書之垢故又以詰曜曜對曰囚撰此書實欲表上懼有誤謬數數省讀不覺點汚被問寒戰形氣啞吃謹追辭叩頭五百下兩手自搏而華覈連上疏救曜皓不許遂誅曜徙其家零陵子隆亦有文學

韋誕字仲將京兆人太僕端之子有文才善屬辭章建安

中爲郡上計吏特拜郎中稍遷侍中中書監伏膺于張怡英兼節鄴淳之法諸書並擅題署尤精明帝凌雲臺初成令仲將題榜高下異好宜就點正之因危懼以戒子孫無

爲大字楷法袁昂云如龍拏虎據劍拔弓張張茂先云京兆韋誕誕子熊頴川鍾繇繇子會並善書書初青龍中洛陽許鄴三都宮觀始就詔令仲將大爲題署以爲永制給御筆墨皆不任用因奏蔡邕自矜能書兼秦李斯漢曹喜之法非純素不妄下筆夫欲善其事必先利其器若用張芝筆左伯紙及臣墨兼此三者然後可以逞徑丈之勢方寸千言然草迹之妙亞乎索靖也誕以光祿大夫遜位嘉平五年年七十五卒于家仲將八分隸書草草飛白入妙小篆入能初太和中誕爲武都太守以能書留補侍中魏氏寶器銘題皆誕書云兄字元將工書子熊亦善書時人云名父之子克有二事世所美云

韋忠字子節平陽人也少慷慨有不可奪之志好學博通

氏姓譜

卷十

五微

韋氏

九

性不虛諾閉門修己不交當世每至吉凶親表贈遺一無所受年十二喪父哀慕毀悴杖而後起司空裴秀吊之匍匐號訴哀慟感人秀出而告人曰此子長大必爲佳器歸而命子顛造焉服闋遂盧于墓所顛慕而造之皆託行不見家貧藜藿不充人不堪其憂而忠不改其樂顛爲僕射數言之于司空張華華辟之辭疾不起人問其故忠曰吾沈簞賤士本無宦情且茂先華而不實裴顛愆而無厭棄典禮而附賊后若此豈大丈夫之所宜行邪裴常有心託我常恐洪濤蕩嶽餘波見漂况可臨尾閭而闕沃焦哉太守陳楚迫爲功曹會山羌破郡楚攜子出走賊射之中三創忠冒刃伏楚以身捍之泣曰韋忠願以身代君乞諸君哀之亦遭五矢賊相謂曰義士也舍之忠負楚以歸後仕劉聰爲鎮西大將軍平羌校尉討叛羌矢盡不屈節而死

韋謏字憲道京兆人也雅好儒學善著述于羣言秘要之義無不綜覽仕于劉曜爲黃門郎後又入石季龍署爲散騎常侍歷守七郡咸以清化著名又徵爲廷尉識者擬之子張前後四登九列六在尚書二爲侍中再爲太子太傅封京兆公好直諫陳軍國之宜多見允納著伏林三千餘言遂演爲典林二十三篇凡所述作及集記世事數十萬言皆深博有才義至再閱又署爲光祿大夫時閔匪其子胤爲大單于而以降胡一千處之麾下謏曰今降胡數千接之如舊誠是招誘之恩然胡羯本爲仇敵今之歟附苟全性命耳或有刺客變起須臾敗而悔之何所及也古人有言一夫不可忸而况千乎願誅屏降胡去單于之號深思聖王苞桑之誠也閔志在緩撫銳于澄定聞其言大怒遂誅之并殺其子伯陽

氏姓譜

卷十

五徵

韋氏

十

韋叡字懷文京兆杜陵人也世爲三輔著姓祖元避吏隱長安南山宋武帝入關以大尉掾徵不至伯父祖征宋末爲光祿勳父祖歸寧遠長史叡事繼母以孝聞祖征累爲郡守每攜叡之職視之如子時叡內兄王愷姨弟杜暉並鄉里盛名祖征謂叡曰汝自謂何如愷暉叡謙不敢對祖征曰汝文章或小減學識當過之然幹國家成功業皆稟汝速也外兄杜幼文爲梁州刺史叡俱行梁土富饒往者多以賄敗叡雖幼獨以廉聞宋永元初袁顛爲雍州刺史見而異之引爲主簿顛到州與鄧琬起兵叡求出爲義成郡故免顛之禍累遷齊興太守本州別駕長水校尉右軍將軍齊末多故欲還鄉里求爲王庸太守俄而太尉陳顯達護軍將軍崔慧景頻逼建鄴人心惶駭西土人謀之

獻曰陳雖舊將非高人才崔頗更事懦而不武天下真人
殆與吾州矣乃遣其二子自結于梁武及兵起檄至獻率
郡人伐竹爲筏倍道來赴有衆二千馬二百匹帝見獻甚
悅撫几曰侘日見君之面今日見君之心吾事就矣師剋
郢魯平荊湖獻多建策皆見用大軍發郢謀留守將上難
其人久之顧獻曰棄騏驎而不乘焉違違而更索卽日以
爲江夏太守行郢州府事初郢城之拒守也男女垂十萬
閉壘經年疾疫死者十七八皆積屍于床下而生者寢處
其上每屋盈滿獻料簡隱恤咸爲營理百姓賴之梁臺建
徵爲大理武帝卽位遷廷尉封梁都子天監二年改封永
昌再遷豫州刺史領歷陽太守魏遣衆來伐獻率州兵擊
走之四年侵魏詭辭獻都督衆軍獻遣長史王趨宗梁郡太
守馮道根攻魏小峴城未能拔獻巡行圍柵魏城中忽出

氏姓譜

卷十

五徵

韋氏

七

數百人陳于門外獻欲擊之諸將皆曰向本輕來請還授
甲而後戰獻曰魏城中二千餘人閉門堅守足以自保今
無故出人于外必其驍勇若能挫之其城自拔衆猶遲疑
獻指其節曰朝廷授此非以爲飾韋獻之法不可犯也乃
進兵魏軍敗因急攻之中宿而城拔遂進討合肥先是右
軍司馬胡景畧至合肥久未能下獻拔行山川曰吾聞汾
水可以灌平陽卽此是也乃堰肥水頃之堰成水通舟艦
繼至魏初分築東西小城夾肥獻先攻二城旣而魏援將
楊靈亂帥軍五萬奄至衆懼不敵請表益兵獻曰賊已至
城下方復求軍且吾求濟師彼亦徵衆師克在和古人之
義也因戰破之軍人少安初肥水堰立使軍主王懷靜築
城于岸守之魏攻陷城乘勝至獻城下軍監潘靈祐勸獻
退還巢湖諸將又請走保三丈獻怒曰將軍死綏有前無

却因令取徽扇麾幢樹之堤下示無動志敵素羸每戰不
嘗騎馬以板輿自載督勵衆軍魏兵鑿堤敵親與爭魏軍
却因築壘于堤以自固起鬪艦高與合肥城等四面臨之
城潰俘獲萬餘所獲軍實無所私焉初胡景畧與前軍趙
祖悅同軍交惡志相陷害景畧一怒自齧其齒齒皆流血
敵以將帥不和將致患禍酌酒自勸景畧曰且願兩好勿
復私鬪故終于此役得無害焉敵每書接客旅夜算軍書
三更起張燈達曙撫循其衆常如不及故投募之士爭歸
之所至頓舍修立館宇藩籬牆壁皆應準灑合肥既平有
詔班師去魏軍旣近懼爲所躡敵悉遣輜重居前身乘小
輿殿後魏人服敵威名望之不敢逼全軍而還于是遷豫
州于合肥五年魏中山王元英攻北徐州圍刺史昌義之
于鍾離衆兵百萬連城四十餘武帝遣征北將軍曹景宗

氏姓譜

卷十

五徵

韋氏

七

拒之次郟陽洲築壘相守未敢進帝怒詔敵會焉賜以龍
環御刀曰諸將有不用命者斬之敵自合肥徑陰陵大澤
過澗谷輒飛橋以濟師人畏魏軍盛多勸敵緩行敵曰鍾
離今鑿穴而處負尸而汲車馳卒奔猶恐其後而况緩乎
旬日而至郟陽初帝勅景宗曰韋敵鄉望宜善敬之景
宗見敵甚謹帝聞曰二將和師必濟矣敵于景宗營前二
十里夜掘長塹樹鹿角截洲爲城比曉而營立元英大驚
以杖擊地曰是何神也景宗慮城中危懼乃募軍士言文
達洪駒麟等齎勅入城使固城守潛行水底得達東城城
中戰守日苦始知有援于是人百其勇魏將楊大眼將萬
餘騎來戰大眼以勇冠三軍所向皆靡敵結車爲陣大眼
聚騎圍之敵以強弩二千一時俱發洞甲穿中殺傷者衆
矢貫大眼右臂亡魂而走明日元英自率衆來戰敵乘素

木輿執白角如意以麾軍一日數合元英甚憚其強魏軍
又夜來攻城飛矢雨集獻子黯請下城以避箭獻不許軍
中驚獻于城上厲聲呵之乃定魏人先于郟陽洲兩岸爲
兩橋樹柵數百步跨淮逼道獻裝大艦使梁郡太守馮道
根廬江太守裴邃秦郡太守李文釗等爲水軍會淮水暴
長獻卽遣之鬪艦競發皆臨賊壘以小船載草灌之以膏
從而焚其橋風怒火盛敢死之士拔柵砍橋水又漂疾倏
忽之間橋柵盡壞道根等皆身自搏戰軍人奮勇呼聲動
天地無不一當百魏人大潰元英脫身遁走魏軍趨水死
者十餘萬斬首亦如之其餘釋甲稽顙乞爲囚奴猶數十
萬獻遣報昌義之義之且悲且喜不暇答但叫曰更生更
生帝遣中書卽周捨勞軍于淮上獻積所獲于軍門捨觀
之謂獻曰君此獲復與熊耳山等矣以功進爵爲侯七年

氏姓譜

卷十

五微 韋氏

五

遷左衛將軍俄爲安西長史南郡太守會司州刺史馬仙
琕自北還軍爲魏人所躡三關擾動詔獻督衆軍援焉獻
至安陸增築城二丈餘更開大塹起高樓衆頗譏其示弱
獻曰不然爲將當有怯時是時元英復追仙琕將復郟陽
之恥聞獻至退帝亦詔罷軍十三年爲丹陽尹以公事免
十四年爲雍州刺史初獻起兵鄉中客陰雙光泣止獻獻
還爲州雙光道候獻笑曰若從公言乞食于路矣餉耕牛
十頭獻于故舊無所惜士大夫年七十以上多與假板縣
令鄉里甚懷之十五年拜表致仕優詔不許徵拜護軍給
鼓吹一部入直殿省居朝廷恂恂未嘗忤視武帝甚禮敬
之性慈愛撫孤兒子過于已子歷官所得祿賜皆散之親
故家無餘財後爲護軍居家無事慕萬石陸賈之爲人因
畫之于壁以自玩時雖老暇日猶課諸兒以學第三子稜

尤明經史世稱其洽聞獻每坐使稜說書其所發詭稜猶弗之逮武帝方銳意釋氏天下咸從風而化獻自以信受素薄位居大臣不欲與衆俯仰所行畧如他日普通元年遷侍中車騎將軍未拜卒于家年七十九遣令薄塋歛以時服武帝卽日臨哭甚慟贈車騎將軍開府儀同三司諡曰嚴獻雅有曠世之度蒞人以愛惠爲本所居必有政績將兵仁愛士卒營幕未立終不肯舍井竈未成亦不先食被服必于儒者雖臨陣交鋒常緩服乘輿執竹如意以塵進止與裴邃俱爲梁世名將餘人莫及初郟陽之役昌義之甚德獻請曹景宗與獻會因設錢二十萬官賭之景宗擲得雉獻徐擲得盧遽取一子反之曰異事遂作塞景宗時與羣帥爭先啟之掇獻獨居後其不尙勝率多如是世尤以此賢之

氏姓譜

卷十

五微

韋氏

西

韋放字元直獻之子也身長七尺七寸腰帶八圍容貌甚偉襲封永昌縣侯位竟陵太守在郡和理爲吏人所稱大通元年武帝遣兼領軍曹仲宗等攻渦陽又以放爲明威將軍總兵會之魏大將軍費穆帥衆奄至放軍營未立麾下止有二百餘人放從弟洵驍果有勇力單騎擊刺屢折魏軍洵馬亦被傷不能進放胄又三貫矢衆皆失色請放突出放厲聲叱之曰今日惟有死耳乃免胄下馬據胡床處分士卒皆殊死戰莫不一當百逐北至渦陽魏又遣常山王元昭大將軍李獎乞伏寶費穆等五萬人來援放大破之渦陽城主王偉以城降魏人棄諸營壘一時奔潰衆軍乘之斬獲畧盡禽穆弟超并王偉送建鄴還爲太子右衛率中大通二年徙北徐州刺史卒于鎮諡曰宣侯放性宏厚篤實輕財好施于諸弟尤雍穆每將遠別及行役初

還常同一室卧起時比之三姜初放與吳郡張率皆有側室懷孕因指爲婚姻其後各產男女未及成長而率亡遺嗣孤弱放嘗贍卹之及爲北徐州時有貴族請昏者放曰吾不失信于故友乃以息岐娶率女又以女適率子時稱放能篤舊

韋正字敬直放弟也位襄陵太守初正與東海王僧孺善及僧孺爲吏部郎參掌大選賓友故人莫不傾意正獨澹然及僧孺擯廢正復篤素分有踰曩日論者稱焉卒于給事黃門侍郎

韋載字德基正之子也少聰慧篤志好學年十二隨叔父稜見蒲國劉顯顯問漢書十事載隨問應無疑滯及長博涉文史沉敏有器局仕梁爲尙書三公郎侯景之亂元帝承制以爲中書侍郎尋爲尋陽太守隨都督王僧辯東討

氏姓譜

卷十

五徵

韋氏

五

侯景景平歷位瑯邪義興太守陳武帝誅王僧辯乃遣周文育襲載載嬰城自守載所屬縣並陳武舊兵多善用弩載收得數十人繫以長鎖令所親監之使射文育軍約曰十發不兩中者死每發輒中所中皆斃相持數旬陳武帝聞文育軍不利以書喻載以誅王僧辯意並奉梁敬帝敕救載解兵載得書乃以衆降陳武帝引載恒置左右與之謀議徐嗣徽任約等引齊軍濟江據石頭城帝問計于載載曰齊軍若分兵先據三吳之路畧地東境則時事去矣今可急于淮南卽侯景故壘築城以通東道轉輸別令輕兵絕其糧運使進無所虜退無所資則齊將之首旬日可致帝從之永定中位散騎常侍太子右衛率天嘉元年以疾去官載有田十餘頃在江乘縣之白山至是遂築室而居屏絕人事吉凶慶吊無所往來不入籬門者幾十載卒

于家

章愛字孝友沉靜有器局高祖父廣晉後軍將軍北平太守曾祖軌以孝武太元之初南遷襄陽爲本州別駕散騎侍郎祖公循宋義陽太守父義正早卒愛少而偏孤事母以孝聞性清介不妄交游而篤志好學每虛室獨坐游心墳素而埃塵滿席寂若無人年十二嘗遊京師值天子出游南苑邑里誼譁老幼爭觀愛獨端坐讀書手不釋卷宗族見者莫不異焉及長博學有文才尤善周易及春秋左氏義袁顛爲雍州刺史辟爲主簿遭母憂廬于墓側負土起墳高祖臨雍州聞之親往臨吊服闋引爲中兵參軍義師之起也以愛爲壯武將軍冠軍南平王司馬帶襄陽令時京邑未定雍州空虛魏興太守顏僧都等據郡反州內驚擾百姓攜貳愛沉敏有謀素爲州里信服乃推心撫御

氏姓譜

卷十

五徵

韋氏

六

曉示逆順兼率募鄉里得千餘人與僧都等戰于始平郡南大破之百姓乃安蕭穎胄之死也和帝徵兵襄陽愛從始興王憺赴焉先是巴東太守蕭瑣巴西太守魯休烈舉兵來逼荊州及王憺至令愛書諭之瑣卽日請降中興二年從和帝東下高祖受禪進號輔國將軍仍爲驍騎將軍尋除寧蜀太守與益州刺史鄧元起西上襲劉季連行至公安道病卒贈衛尉卿子乾何官至驍騎將軍征北長史汝陰鍾離二郡太守

韋瑱字世珍京兆杜陵人也世爲三輔著姓曾祖惠度姚宏尚書卽隨劉義真過江仕宋爲順陽太守行南雍州事後于襄陽歸魏拜中書侍郎贈洛州刺史祖千雄畧陽郡守父英代郡守贈兖州刺史瑱幼聰敏有夙成之量起家太尉府法曹參軍累遷諫議大夫周文帝爲丞相封長安

縣男轉行臺左丞遷南郢州刺史復令爲行臺左丞琪明
察有幹局再居左轄時論榮之從復宏農戰沙苑加衛大
將軍左光祿大夫從戰河橋進爵爲子大統八年齊神武
侵汾絳瑣從周文禦之軍還以本官鎮蒲津關帶中渾城
主歷鴻臚卿以望族兼領鄉兵加帥都督進散騎常侍魏
恭帝三年賜姓宇文氏三年除瓜州刺史州通西域蕃夷
往來前後刺史多受賂遺胡寇犯邊又莫能禦瑣雅性清
儉兼有武畧蕃夷贈遺一無所受胡人畏威不敢爲寇公
私安靜夷夏懷之周孝閔帝踐阼進爵平齊縣伯秩滿還
京東人戀慕老幼追送留連十數日方得出境明帝嘉之
授侍中驃騎大將軍開府儀同三司卒贈岐宜二州刺史
諡曰惠又追封爲公諡其子峻龔峻位至車騎大將軍儀
同三司

氏姓譜

卷十

五微 韋氏

七

韋稜字威直正弟也性恬素以書史爲業博物強記當世
士咸就質疑位終光祿卿著漢書續訓二卷

韋黯字務直稜弟也性強正少習經史位太府卿侯景濟
江黯屯六門尋改爲都督城西面諸軍事時景于城外起
東西二土山城內亦應之簡文親自負土哀太子以下躬
執畚鍤黯守西土山晝夜苦戰以功授輕車將軍加持節
率于城內初黯爲太僕卿而兄子粲爲左衛率黯以常快
快謂人曰韋粲已落驂駟前朝廷是能育才不識者頗以
此闕之

韋叔裕

字孝寬京兆杜陵人也少以字行世爲三輔著姓

祖直善魏馮翊扶風二郡守父旭武威郡守建義初爲大
行臺右丞加輔國將軍雍州大中正永安二年拜右將軍
南幽州刺史時氏賊數爲抄竊旭隨機招撫並卽歸附尋

卒官贈司空冀州刺史諡曰文惠孝寬沉敏和正涉獵經史弱冠屬蕭寶夤作亂關右乃詣關請爲軍前驅朝廷嘉之卽拜統軍隨馮翊公長孫承業西征每戰有功拜國子博士行華山郡事屬侍中楊侃爲大都督出鎮潼關引孝寬爲司馬侃奇其才以女妻之永安中授宣威將軍給事中尋賜爵山北縣男普泰中以都督從荊州刺史源子恭鎮穰城以功除淅陽郡守時獨孤信爲新野郡守同隸荊州與孝寬情好欵密政術俱美荆部吏人號爲連璧孝武初以都督鎮城周文帝自原州起雍州命孝寬隨軍及剋潼關卽授宏農郡守從禽寶泰兼左丞節度宜陽兵馬事仍與獨孤信入洛陽城郡守復與宇文貴怕峰應接潁川義徒破東魏將任祥堯雄于潁川孝寬又進平樂口下豫州獲刺史馮邕又從戰于河橋時大軍不利邊境騷然乃

氏姓譜

卷十

五徵

韋氏

六

令孝寬以本將軍行宜陽郡事尋遷南兗州刺史是歲東魏將段琛堯傑復據宜陽遣其揚州刺史牛道恒扇誘邊人孝寬深慮之乃遣謀人訪獲道恒手迹令善學書者僞作道恒與孝寬書諭歸欵意又爲落燼燒迹若火下書者還令謀人送于琛營琛得書果疑道恒其所欲經畧皆不見用孝寬知其離阻因出奇兵掩襲禽道恒及琛等噍澠遂清大統五年進爵爲侯八年轉晉州刺史尋移鎮玉壁兼攝南汾州事先是山胡負險屢爲劫盜孝寬示以威信州境肅然進授大都督十二年齊神武傾山東之家志圖西入以玉壁衝要先命攻之連營數十里至于城下乃于城南起土山欲乘之以入當其山處城上先有兩高樓孝寬更縛木接之令極高峻多積戰具以禦之齊神武使謂城中曰縱爾縛樓至天我會穿城取爾遂于城南鑿地道

又于城北起土山攻具晝夜不息孝寬復掘長壘要其地道仍簡戰士甬壘城外每穿至壘戰士卽禽殺之又于壘外積柴貯火敵人有在地道內者便下柴火以皮排吹之火氣一衝咸卽灼爛城外又造攻車車之所及莫不摧毀雖有排楯莫之能抗孝寬乃縫布爲縵隨其所向則張設之布懸于空中其車竟不能壞城外又縛松于竿灌油加火規以燒布并欲焚樓孝寬復長作鐵鉤利其鋒刃火竿一來以鉤遙割之松麻俱落外又于城四面穿地作二十一道分爲四路于其中各施梁柱作訖以油灌柱放火燒之柱折城竝崩壞孝寬又隨崩處堅木柵以扞之敵不得入城外盡其攻擊之術孝寬咸拒破之神武無如之何乃遣倉曹參軍祖孝徵謂曰未聞救兵何不降也孝寬報云我城池嚴固兵食有餘攻者自勞守者常逸豈有旬朔之

氏姓譜

卷十

五微

韋氏

九

間已須救援適憂爾眾有不反之危孝寬闕西男子必不爲降將軍也俄而孝徵復謂城中人曰韋城主受彼榮祿或復可爾自外軍士何事相隨入湯火中邪乃射募格于城中云能斬城主降者拜太尉封開國郡公邑萬戶賞帛萬匹孝寬手題書背反射城外云若有斬高歡者亦依此賞孝寬弟子遷先在山東又鎖至城下臨以白刃若有不早降便行大戮孝寬慷慨激揚畧無顧意士卒莫不感勵人有死難之心神武苦戰六旬傷及病死者十四五智力俱困因而發疾其夜遁去後因此忿恚遂殂魏文帝嘉孝寬功令殿中尚書長孫緒遠左丞王悅至玉壁勞問授驍騎大將軍開府儀同三司進爵建忠郡公廢帝二年爲雍州刺史先是路側一里置一土堠經雨頽毀每須修之自孝寬臨州仍勒部內當堠處植槐樹代之旣免修復行旅

又得庇蔭周文後見怪問知之曰豈得一州獨爾天下同之于是令諸州夾道一里種一樹十里種三樹百里種五樹焉恭帝元年以大將軍與燕公于謹伐江陵平之以功封穰縣公還拜尚書右僕射賜姓宇文氏三年周文北巡命孝寬還鎮玉壁周孝閔帝踐昨拜小司徒明帝初參麟趾殿學士考校圖籍保定初以孝寬立勳玉壁置勳州仍授勳州刺史齊人遣使至玉壁求通互市晉公護以其相持日久絕無使命一日忽來求交易疑別有故又以皇姑皇世母先沒在彼因其請和之際或可致之遂令司門下大夫尹公正至玉壁共孝寬詳議乃于郊盛設供帳令公正接對使人兼論皇家親屬在東之意使者辭色甚悅時又有汾州胡抄得關東人孝寬復放東還並致書一牘具陳朝廷欲敦鄰好遂以禮送皇姑及護母等孝寬善于撫

氏姓譜

卷十

五微 韋氏

三

御能得人心所遣間諜入齊者皆爲盡力亦有齊人得孝寬金貨遙通書疏故齊動靜朝廷皆先知時有主帥許益孝寬度以心膂令守一城益乃以城東入孝寬怒遣謀取之俄而斬首而還其能致物情如此汾州之北離石以南悉是生胡抄掠居人阻斷河路孝寬深慮之而地入于齊無方誅翦欲當其要處置一大城乃于河西徵役徒十萬甲士百人遣開府姚岳監築之岳色懼以兵少爲難孝寬曰計成此城十日卽畢旣去晉州四百餘里一日劊手二日僞境始知設令晉州徵兵二日方集謀議之間自稽三日計其軍行二日不到我之城墮足得辦矣乃令築之齊人果至南首疑有大軍乃停留不進其夜又令汾水以南傍介山稷山諸村所在縱火齊人謂是軍營遂收兵自固版築克就卒如其言四年進位柱國時晉公護將東討孝

寬遣長史辛道憲啟陳不可護不納既而大軍果不利後
孔城遂陷宜陽被圍孝寬乃謂其將帥曰宜陽一城之地
未能損益然兩國爭之勞師數載彼多君子寧乏謀猷若
棄崤東來圖汾北我之疆界必見侵擾今宜于華谷及長
秋速築城以杜賊志脫其先我圖之實難于是畫地形具
陳其狀晉公護令長史叱羅協謂使人曰韋公子孫雖多
數不滿百汾北築城遣誰固守事遂不行天和五年進爵
鄆國公增邑逼前萬戶是歲齊人解宜陽之圍經畧汾北
遂築城守之其丞相斛律明月率數十騎至汾東請與孝
寬相見明月云宜陽小城久勞戰爭今既入彼欲于汾北
取償幸勿怪也孝寬答曰宜陽彼之要衝汾北我之所棄
我棄彼圖取償安在且若輔翼幼主位重望隆理宜調陰
陽撫百姓焉用極武窮兵結怨連禍且滄瀛大水千里無

氏姓譜

卷十

五微

韋氏

三

烟復欲使汾晉之間橫尸暴骨苟貪尋常之地塗炭無辜
之人竊爲君不取孝寬參軍曲巖頗知卜筮謂孝寬曰來
年東朝必大相殺戮孝寬因令巖作謠歌曰百升飛上天
明月照長安百升斛也又言高山不摧自崩櫛樹不扶自
豎今謀人多齎此文遺之于鄴祖孝徵既聞更潤色之明
月竟以此誅建德之後武帝志在平齊孝寬乃上疏陳三
策書奏武帝遣小司寇淮南公元衡開府伊婁謙等重幣
聘齊爾後遂大舉再駕而定山東卒如孝寬之策孝寬每
以年迫懸車屢請致仕帝以海內未平優詔弗許至是復
稱疾乞骸骨帝曰往以面申本懷何煩重請也五年帝東
伐過幸玉壁觀禦敵之所深歎美之移時乃去孝寬自以
習練齊人虛實請爲先驅帝以玉壁要衝非孝寬無以鎮
之乃不許及趙王招率兵出稽胡與大軍犄角乃赦孝寬

爲行軍總管圍守華谷以應接之孝寬克其西城武帝平
晉州復令孝寬還舊鎮及帝凱旋復幸玉壁從容謂孝寬
曰世稱老人多智善爲軍謀然朕惟共少年一舉平賊公
以爲如何孝寬對曰臣今衰耄惟有誠心而已然昔在少
壯亦曾輸力先朝以定關右帝大笑曰實如公言乃詔孝
寬隨駕還京拜大司空出爲延州總管進位上柱國大象
九年除徐兗等十一州十五鎮諸軍事徐州總管又爲行
軍元帥徇地淮南乃分遣祀公宇文亮攻黃城邨公梁士
彥攻廣陵孝寬率衆攻壽陽並拔之初孝寬到淮南所在
皆密送誠款然彼五門尤爲險要陳人若開塘放水卽津
濟路絕孝寬遽令分兵據守之陳刺史吳文立果遣決堰
已無及于是陳人退走江北悉平軍還至豫州宇文亮舉
兵文立以數百騎襲孝寬營時亮國官茹寬密白其狀孝

氏姓譜

卷十

五微

韋氏

三

寬有備亮不得入遁走孝寬追獲之詔以平淮南之功別
封一子滑國公及宣帝崩隋文帝輔政時尉遲迥先爲相
州總管詔孝寬代之又小以司徒叱列長文爲相州刺史
先令赴鄴孝寬續進至朝歌迥遣其大都督賀蘭貴齋書
候孝寬孝寬留貴與語以察之疑其有變遂稱疾徐行又
使人至相州求醫藥密以伺之旣到湯陰逢長文奔還孝
寬兄子魏郡守藝又棄郡南走孝寬審知其狀乃馳還所
經橋道皆令毀撤驛馬悉擁以自隨又勒驛將曰蜀公將
至可多備酒及芻粟以待之迥果遣儀同梁子康將數
百騎追孝寬驛司供設豐厚所經之處皆輒停留由是不
及時或勸孝寬以爲洛京虛弱素無守備河陽鎮防悉是
關東鮮卑迥若先往據之則爲禍不小乃入保河陽河陽
城內舊有鮮卑八百人家並在鄴見孝寬輕來謀欲應迥

孝寬知之遂密造東京官司詐稱遣行人詣洛受賜既至洛陽竝留不遣因此離解其謀不成六月詔發關中兵以孝寬爲元帥東伐七月軍次河陽迥所署儀同薛公禮等圍逼懷州孝寬遣兵擊破之進次懷縣永橋城之東南其城既在要衝雉堞牢固迥已遣兵據之諸將士以此城當路請先攻孝寬曰城小而固若攻而不拔損我兵威今破其大軍此亦何能爲也于是引軍次于武陟大破迥子惇惇輕騎奔鄴軍次于鄴西門豹祠之南迥自出戰又破之迥窮迫自殺兵士在小城中者盡坑之于游豫園諸有未服皆隨機討之關東悉平十月凱還京師十一月薨時年七十二贈太傅十二州諸軍事雍州牧謚曰襄孝寬在邊多載屢抗強敵所有經畧布置之初人莫之解見其成事方乃驚服雖在軍中篤意文史政事之餘每自披閱未

氏姓譜

卷十

五徵

韋氏

三

年患眼猶令學士讀而聽之又早喪父母事兄嫂甚謹所得俸祿不入私房親族有孤遺者必加振贍朝廷稱焉

韋總字善會孝寬之子也聰敏好學位驍騎大將軍開府儀同三司納言京兆尹帝嘗戲總曰卿師尹帝鄉故當不以富貴威福鄉里邪總正色對曰陛下擢臣非分竊謂已鑿愚誠今奉嚴旨便似未照丹赤豈可久忝此職用疑聖慮請解印綬以避賢能帝大笑曰前言戲之耳五年從武帝東征總每率麾下先驅陷敵遂于并州戰沒時年二十九贈上大將軍追封河南郡公謚曰貞六年重贈柱國五州刺史子國成嗣後襲孝寬爵鄴國公隋文帝追錄孝寬舊勳開皇初詔國成食封三千戶收其租賦

韋質字敬遠孝寬之兄也志尚夷簡滯于榮利弱冠被召拜雍州中從事非其好也遂謝疾去前後十見徵辟皆不

應命屬周文帝經綸王業側席求賢聞賈養高不仕虛心
敬悅遣使辟之借加禮命雖情諭甚至而竟不能屈彌以
重之亦弗之奪也所居之宅枕帶林泉賈對翫琴書蕭然
自逸時人號爲居士焉至有慕其閑素者或載酒從之賈
亦爲之盡歡接對忘倦明帝卽位禮敬愈厚乃爲詩以貽
之曰六爻貞遯世三辰光少微穎陽讓逾遠滄洲去不歸
香動秋蘭佩風飄蓮葉衣坐石窺仙洞乘槎下釣磯嶺松
千仞直巖泉百丈飛聊登平樂觀遙望首陽薇詎能同四
隲來參余萬機賈答帝詩願時時朝謁帝大悅敕有司日
給河東酒一升號之曰逍遙公時晉公護執政廣營第宅
嘗召賈至宅訪以政事賈仰視其堂徐而歎曰酣酒嗜音
峻宇雕牆有一于此未獲弗亡護不悅有識者以爲知言
陳遣其尙書周宏正來聘素聞賈名請與相見朝廷許之

氏姓譜

卷十

五徵

韋氏

三

宏正乃造賈談諱盡日恨相遇之晚後請賈至賓館賈不
時赴宏正乃贈詩曰德星猶未動真車詎肯來其爲當時
所欽挹如此武帝嘗與賈夜宴大賜之繡帛令侍臣數人
負以送出城惟取一匹示承恩旨而已帝以此益重之孝
寬爲延州總管賈至州與孝寬相見將還孝寬以所乘馬
及轡勒與賈賈以華飾心弗欲之笑謂孝寬曰昔人不棄
遺簪墜屨者惡與之同出不與同歸吾之操行雖不逮前
烈然捨舊錄新亦非吾志也于是乃乘舊馬以歸武帝又
以佛道儒三教不同詔賈辨其優劣賈以三教雖殊同歸
于善其迹似有深淺其致理如無等級乃著三教序奏之
帝覽而稱善時宣帝在東宮亦遺賈書并令以帝所乘馬
迎之問以立身之道賈對曰傳不云乎儉爲德之恭侈爲
惡之大欲不可縱志不可滿並聖人之訓也願殿下察之

賈子權行隋州刺史因疾物故孝寬子總復于并州戰沒
一日之中凶問俱至家人相對悲慟而賈神色自若謂之
曰死生命也去來常事亦何足悲援琴撫之如舊賈又雅
好名義虛襟善誘雖耕夫牧豎有一介可稱者皆接引之
特與族人處元及安定梁曠爲放逸之友少愛文史留情
著述手自抄錄數十萬言晚年虛靜惟以體道會真爲務
舊所制述咸削其稿故文筆多並不存建德中賈以年老
預戒其子等曰昔士安以蘧籛束體王孫以布囊燒尸二
賢高達非庸才能繼吾死之日可歛舊衣勿更新造使棺
足周尸牛車載柩墳高四尺墻深一丈其餘煩雜悉無用
也朝脯奠食于事彌煩吾不能頓絕汝輩之情可朔望一
奠而已仍薦蔬素勿設牲牢親友欲以物吊祭竝不得爲
受吾常恐臨終恍惚故以此言預戒汝輩瞑目之日勿違

氏姓譜

卷十

五徵

韋氏

五

吾志也宣政元年二月卒于家時年七十七武帝遣使吊
祭賻賻有加其喪制塋禮諸子等並遵其遺戒

韋閻字友觀京兆杜陵人世爲三輔冠族祖楷晉建威將
軍長樂清河二郡太守父達慕容容垂吏部郎大長秋卿閻
少有器望值慕容氏政亂避地于薊城魏太武徵拜咸陽
太守轉武都太守屬杏城鎮將郝溫及蓋吳反關中擾亂
閻盡心撫納所部獨全在郡十六年卒子範嗣
韋儁字穎超範之子也早有學識少孤事祖母以孝聞性
溫和廉讓爲州里所稱太和中龔爵除荊州治中轉梁州
寧朔府長史還爲太尉外兵參軍本州中正遷都水使者
所在有聲宣武崩領軍于忠矯擅威刑與左僕射郭祚尙
書裴植同時遇害時年五十七儁與祚婚家爲忠所惡故
及于難臨終儁訴枉于尙書元欽欽知而不敢申理儁歎

曰吾一生爲善未蒙善報常不爲惡今爲惡終悠悠蒼天
抱直無訴其時人咸怨傷焉熙平元年追贈中壘將軍洛
州刺史諡曰貞有子十三人

韋珍字靈智圓之族弟也魏孝文賜名焉父尙宇文叔樂
安王良安西府從事中郎卒贈安遠將軍雍州刺史珍少
有志操解褐京兆王子推常侍轉尚書南部郎孝文初蠻
首桓誕歸欵朝廷思安邊之畧以誕爲東荊州刺史令珍
爲使與誕招慰蠻左珍自懸瓠西入三百餘里至桐柏山
窮淮源宣揚恩澤莫不降附淮源舊有祠堂蠻俗恒用人
祭之珍乃曉告曰天地明靈卽是民之父母豈有父母甘
子肉味自今以後悉宜以酒脯代用羣蠻從約至今行之
凡所招降七萬餘戶置郡縣而還以奉使稱旨除左將軍
樂陵鎮將賜爵霸城子蕭道成司州民謝天蓋自署司州

氏姓譜

卷十

五微

韋氏

三

刺史規欲以州內附事泄爲道成將崔慧景攻圍詔珍率
在鎮士馬渡淮援接時道成聞珍將至遣將苟元賓據淮
逆拒珍乃分遣鐵馬于上流潛渡親率步士與賊對接旗
鼓始交甲騎奄至腹背奮擊破之天蓋尋爲左右所殺降
于慧景珍乘勝馳進又被慧景擁降民七千餘戶內徙表
置城陽剛陵義陽三郡以處之孝文詔珍移鎮北陽蕭贖
遣其雍州刺史陳顯達率衆來寇城中將士咸欲出戰珍
曰彼初至氣銳未可便挫且共堅守待其攻我疲弊擊之
未晚于是憑城拒戰殺傷甚衆相持旬有二日夜開城門
掩擊之賊遂奔潰以功進爵爲侯車駕南討珍上便宜并
自陳在邊歲久悉其要害願爲前驅詔珍爲隴西公源懷
衛大將軍府長史轉太保齊郡王長史遷顯武將軍郢州
刺史在州有聲績朝廷嘉之遷龍驤將軍賜驂騮二匹帛

五十疋穀三百斛珍乃名集州內孤貧者謂曰天子以我能綏撫卿等故賜以穀帛吾何敢獨當遂以所賜悉分與之尋加平南將軍荊州刺史與尚書盧淵征赭陽爲蕭鸞將垣歷生蔡道貴所敗免歸鄉里臨別謂淵曰主上聖明志吞吳會用兵機要在於上流若有事荆楚恐老夫復不得停耳後車駕征樊郢復起珍爲中軍大將軍彭城王勰長史沔北旣平以珍爲建威將軍試守魯陽郡孝文復南伐路經珍郡加中壘將軍正太守珍從至濟水孝文曰朕頃戎車再駕卿常翼務中軍今日之舉亦欲與卿同行但三鴟險要非卿無以守也因勅珍辭還及孝文崩于行宮秘匿而還至珍郡始發大諱還除中散大夫尋加鎮遠將軍太尉諮議參軍永平元年卒時年七十四贈本將軍南青州刺史諡曰懿

氏姓譜

卷十

五微

韋氏

七

韋纘字遵彥珍之長子也年十三補中書學生聰敏明辯爲博士李彪所稱除秘書中散遷侍御中散孝文每與名德沙門談論往復纘掌綴錄無所遺漏頗見知賞轉散騎侍郎徙太子中舍人仍兼黃門又兼司徒右長史尋轉長兼尚書左丞壽春內附尚書令王肅出鎮揚州纘爲長史加平遠將軍帶梁郡太守肅薨救纘行州事任城王澄代肅爲州復啟纘爲長史澄出征之後肅衍將姜虔真乘虛攻襲遂據外郭雖尋克復纘坐免官永平三年卒年四十五

韋彧字遵慶纘之弟也有學識解褐奉朝請遷太尉騎兵參軍出爲雍州治中轉別駕入爲司徒掾尋轉散騎侍郎稍遷平遠將軍東豫州刺史彧綏懷蠻左頗得其心蠻首田益宗子魯生魯賢先叛父南入數爲寇掠自彧至州魯

生等咸賤敢修敬不復爲害或以蠻俗荒梗不識禮儀乃表立太學選諸郡生徒于州總教又于城北置崇武館以習武焉境內清肅還遇大將軍京兆王繼西征請爲長史并通直散騎常侍尋以本官兼尙書爲幽夏州行臺以功封陰盤縣開國男邑二百戶孝昌元年秋卒于長安贈撫軍將軍雍州刺史諡曰文

韋祐字法保京兆山北人也少以字行于世世爲州郡著姓祖駢雍州主簿舉秀才拜中書博士父義前將軍上洛郡守魏大統時以法保著勲追贈秦州刺史法保少好遊俠而質直少言所與交遊皆輕猾亡命人有急難投之者多保存之雖屢被追捕終不改其操父沒事母兄以孝敬聞慕李長壽之爲人遂娶長壽女因寓居關南正光末四方雲擾王公被難者或依之多得全濟以此爲貴將所德

氏姓譜

卷十

五徵

韋氏

三

乃拜員外散騎侍郎加輕車將軍及魏孝武西遷法保從山南赴行在所除右將軍太中大夫封固安縣男邑二百戶及長壽被害其子延孫收長壽餘衆守禦東境朝廷恐延孫兵少不能自固乃除法保東洛州刺史配兵數百人以援延孫法保至潼關宏農郡守韋孝寬謂法保曰恐于此役難以吉還也法保曰古人稱不入虎穴不得虎子安危之事未可預量縱爲國殞身亦非所恨遂倍道兼行東魏陝州刺史劉貴以步騎千餘邀之法保命所部爲圓陣且戰且前數日得與延孫兵接乃并勢置柵于伏流未幾太祖追法保與延孫率衆還朝賞勞甚厚乃授法保大都督四年除河南尹及延孫被害法保乃率所部據延孫舊柵頻與敵相交兵每身先士卒單馬陷陣是以戰必被傷嘗至關南與東魏人戰流矢中頸從口中出當時氣絕輿

至營久之乃蘇九年拜車騎大將軍儀同三司鎮九曲城及侯景以豫州來附法保率兵赴景景欲留之法保疑其有貳心乃固辭還所鎮十五年加驃騎大將軍開府儀同三司尋進爵爲公會東魏遣軍送糧饋宜陽法保潛邀之轉戰數十里兵少不敵爲流矢所中卒于陣諡莊子初嗣

隋

韋鼎字超盛載弟也少通曉博涉經史明陰陽逆刺尤善相術仕梁起家湘東王法曹參軍遭父憂水漿不入口者五日哀毀過禮殆將滅性服闋爲邵陵王主簿侯景之亂鼎兄昂于京口戰死鼎負屍出寄于中興寺求棺無所得鼎哀憤慟哭忽見江中有物流至鼎所竊異之往視乃新棺也因以充歛元帝聞之以爲精誠所感侯景平司徒王僧辯以爲戶曹屬累遷中書侍郎陳武帝在南徐州鼎望

氏姓譜

卷十

五微 韋氏

元

氣知其當王遂寄孥焉因謂陳武帝曰明年有大臣誅死後四歲梁其代終天之歷數當歸舜後昔周滅殷氏封嬀汭于宛邱其裔子孫因爲陳氏僕觀明公天縱神武繼絕統者無乃是乎武帝陰有圖僧辯意聞其言大喜因而定策及受禪拜黃門侍郎太建中以廷尉卿爲聘周使加散騎常侍後爲太府卿至德初鼎盡貨田宅寓居僧寺友人

大匠卿毛彪問其故答曰江東王氣盡于此矣吾與爾當塋長安期運將及故破產爾初鼎之聘周也當遇隋文帝謂曰觀公容貌不久必大貴貴則天下一家歲一周天老夫當委質願深自愛及陳亡驛名入京授上儀同三司待遇甚厚每公宴鼎恒預焉性簡貴雖爲亡國之臣未嘗俯仰當世時吏部尙書韋世康兄弟顯貴隋文帝從容謂鼎曰世康與公遠近對曰臣宗族南徙昭穆非臣所知帝曰

卿百代卿族豈忘本也命官給酒肴遣世康請鼎還杜陵
鼎乃自楚太傅孟以下二十餘世並考論昭穆作韋氏譜
七卷示之歡飲十餘日乃還時蘭陵公主寡上爲之求夫
選親衛柳述及蕭瑒等以示鼎鼎曰瑒等封侯而無貴妻
之相述亦通顯而守位不終上曰位由我耳遂以主降述
上又問鼎諸兒誰爲嗣位答曰至尊皇后所最愛者當與
之非臣敢預知也上笑曰不肯顯言乎開皇十三年除光
州刺史以仁義教導務宏清靜州中有土豪外修邊幅而
內行不軌常爲劫盜鼎于都會時謂之曰卿是好人那忽
作賊因條其徒黨姦謀逌迤其人驚懼卽自首伏又有人
客游通主家之妾及其還去妾盜珍物于夜逃亡尋于草
中爲人所殺主家知容與妾交通因告殺之縣司鞫問得
姦狀因斷客死獄成上于鼎鼎覽之曰此客實姦而不殺

氏姓譜

卷十

五徽

韋氏

三十

也乃某寺僧詿妾盜物令奴殺之賊在某處卽放此客遣
人掩僧并獲贓物自是部內肅然咸稱其神道無拾遺尋
追入京頃之而卒于長安年七十九

韋世康夏之子也幼而沉敏有器度年十歲州辟主簿在
魏襄寇爲直寢封漢安縣公尙周文帝女襄樂公主授儀
同三司仕周歷位典祠下大夫沔碭二州刺史從武帝平
齊授司州總管長史時東夏初定百姓未安世康綏撫之
士庶胥悅入爲戶部中大夫進位上開府轉司會中大夫
尉遲迥之亂隋文帝謂世康曰汾絳舊是周齊分界因此
亂階恐生搖動今以委公因授絳州刺史以雅望鎮之閭
境清肅世康性恬素好古不以得喪干懷在州有止足之
志與子弟書曰吾生因緒餘風霑纓弁馳馳不已四紀于
茲亟登衮命頻蒞方岳志除三惑心慎四知以不貪而爲

寶處脂膏而莫潤如斯之事頗爲時悉今耄雖未及壯年已謝霜早梧楸風先蒲柳眼闇更劇不見細書足疾彌增非可趨走祿豈須多防滿則退年不待暮有疾便辭况孳春秋已高溫清宜奉晨昏有闕罪在我躬今世穆世文竝從武役吾與世冲復嬰遠任陟岵瞻望此情彌切桓山之悲倍深常戀意欲上聞乞遵禮教未訪汝等故遣此及與言遠慕感咽難勝諸弟報以事恐難遂乃止在任有惠政奏謀連最擢爲禮部尙書世康寡嗜慾不慕勢貴未嘗以位望矜物聞人之善若已有之亦不顯人過咎以求名譽進爵上庸郡公轉吏部尙書選用平允請託不行以母憂去職固辭乞終私制上不許閔皇七年將事江南議重方鎮拜襄州刺史坐事免未幾授安州總管遷信州總管十三年復拜吏部尙書前後十餘年間多所進拔朝廷稱爲

氏姓譜

卷十

五徵

韋氏

三

廉平後因侍宴世康再拜陳讓願乞骸骨上曰與公共理天下今之所請深乖本望縱筋力衰謝猶屈公卧臨一隅于是出拜荊州總管時天下惟置荆并楊益四大總管并楊益三州竝親王臨統惟荊州委于世康時論以此爲美世康爲政簡靜百姓愛悅卒于州聞而痛惜贈大將軍諡曰文世康性孝友初以諸弟位並隆貴獨季弟世約宦塗不達共推父時田宅盡以與之世多其義長子福子位司隸別駕次子福嗣位內史舍人後以罪黜

韋沈字世穆世康兄也性剛毅有器幹少便弓馬仕周釋褐直寢上士數從征伐累遷開府賜爵衛國縣公隋文帝爲丞相從季父孝寬擊尉遲迥于相州以功拜柱國進襄陽郡公時突厥寇邊皇太子屯咸陽令沈統兵出原州道與虜相遇擊破之拜江陵總管俄拜安州總管伐陳之役

爲行軍總管及陳平拜江州總管畧定九江遂進圖嶺南
上與書慰勉之沈至廣州嶺表皆降之上聞而大悅許以
便宜從事沈所綏集二十四州拜廣州總管歲餘番禺夷
王仲宣反以兵圍沈沈拒之中流矢卒贈上柱國賜綿絹
萬段諡曰敬子協字欽仁好學有雅量位秘書郎其父在
廣州有功上命協齋詔書勞問未至而父卒上以其父死
王事拜協柱國歷定息泰三州刺史有能名

韋藝字世文沈之弟也周武帝時以軍功位上儀同賜爵
修武縣侯授左旅下大夫出爲魏郡太守及隋文帝爲丞
相尉遲迥陰圖不軌朝廷遣藝季父孝寬馳往代迥孝寬
將至鄴詐病止傳舍從迥求藥以密觀變藝因投孝寬卽
從孝寬擊迥以功進位上大將軍改封武威縣公以修武
縣侯別封一子文帝受禪進封魏興郡公拜齊州刺史爲
卒官諡曰懷

氏姓譜

卷十

五微

韋氏

三

政通簡士庶懷惠遷營州總管藝容貌瓌偉每夷狄參謁
必整儀衛盛服以見之獨坐滿一榻蕃人畏懼莫敢仰視
韋冲字世冲藝弟也以名家子在周釋褐衛公府禮曹參
軍從大將軍元定度江伐陳爲陳人所虜周武帝以幣贖
還之帝復令冲以馬千匹使陳贖開府賀拔華等五十人
及元定之柩而還冲有辭辯奉使稱旨累遷小御伯下大
夫加上儀同拜汾州刺史隋文帝踐阼徵兼散騎常侍進
位開府賜爵安固縣侯歲餘發南汾州胡千餘人北築長
城在塗皆亡上呼冲問之冲曰皆由收宰不稱所致請以
理綏靜可不勞兵而定上因命冲綏懷叛者月餘竝起長
城上降書勞勉之尋拜石州刺史甚得諸胡歡心以母憂
去職俄起爲南寧州總管持節撫慰復遣柱國王長述以

兵繼進冲既至南寧渠帥首領皆詣府參謁上大悅下詔
褒揚之其兄子伯仁在府掠人之妻竟坐免官其弟太子
洗馬世約詣元崑于皇太子上謂太子曰古人云酤酒酸
而不售者爲噬犬耳今何用世約乎世約遂除名後令冲
檢校括州事時東陽賊帥陶子定吳州賊帥羅慧方竝聚
衆爲亂冲率兵破之改封義豐縣侯檢校泉州事遷營州
總管冲容貌都雅寬厚得衆心撫馘羯契丹皆能致其死
力奚霫畏懼朝貢相續高麗嘗入寇冲擊走之及文帝爲
豫章王陳納冲女爲妃徵拜戶部尙書卒官少子挺知名
韋師字公頴瑱子也少沉謹有至性初就學始讀孝經捨
書而歎曰名教之極其在茲乎少丁父母憂居喪盡禮州
里稱其有孝行及長畧涉經史尤工騎射周大象宰宇文
護引爲中外府記室轉資曹參軍師雅知諸蕃風俗及山

氏姓譜

卷十

五徵

韋氏

三

川險易其有夷狄朝貢師必接對論其國俗如視諸掌夷
人驚服無敢隱情齊王憲爲雍州牧引爲主簿本官如故
及武帝親總萬機轉少府大夫及齊平詔師安撫山東徙
爲賓部大夫隋文帝受禪受吏部侍郎賜爵井陘侯遷河
北道行臺兵部尙書奉詔爲山東河南十八州安撫大使
奏事稱旨兼領晉王廣司馬其族人世康爲吏部尙書與
師素懷勝負于時廣爲雍州刺史存望第以司空揚雄尙
書左僕射高熲竝爲州都督引師爲主簿而世康弟世約
爲法曹從事世康志恨不能食又恥世約在師之下名世
約數之曰汝何故爲從事遂杖之後從上幸醴泉宮上召
師與左僕射高熲上柱國韓擒等于卧內賜宴令各叙舊
事以爲笑樂平陳之役以本官領元帥掾陳國府藏悉委
于師秋毫無犯稱爲清白後上爲長寧王儼納其女爲妃

除汴州刺史甚有政名卒官諡曰定

諱

韋思謙名仁約以近武后父諱爲嫌遂以字行其先出雍州杜陵後客襄陽更徙爲鄭州陽武人八歲喪母以孝聞及進士第累調應城令負殿不得進官吏部尙書高季輔曰予始得此一人豈以小疵棄大德邪擢監察御史常曰御史出使不能動搖山嶽震懼州縣爲不任職中書令褚遂良市地不如直思謙劾之罷爲同州刺史及復相出思謙清水令或吊之答曰吾猶直觸機輒發暇卹身乎丈夫當敢言地要須明目張膽以報天子焉能錄錄保妻子邪沛王府長史皇甫公義引爲倉曹參軍謂曰公非池中物屈公爲數旬客以重吾府改侍御史高宗賢之每召與語雖甚倦徙倚軒檻猶數刻罷疑獄劇事多與參裁武侯將

氏姓譜

卷十

五微

韋氏

三

軍田仁會誣奏御史張仁禕帝廷詰仁禕懦不得對思謙爲辯其枉因言仁會營罔陷人不測者詞旨詳暢帝善之仁禕得不坐累遷右司郎中尙書左丞振明綱轄朝廷肅然進御史大夫性譽謬顏色莊重不可犯見王公未嘗屈禮或以爲譏答曰耳目官固當特立鵬鸞豈衆禽之偶奈何屈以狎之帝崩思謙扶疾入臨涕泗冰須俯伏號絕詔給扶侍轉司屬卿復爲右肅政大夫故事大夫與御史鈞禮思謙獨不答或以爲疑思謙曰班列固有差奈何尙姑息邪垂拱初封博昌縣男同鳳閣鸞臺三品轉納言辭疾不許詔肩輿以朝聽于孫侍以太中大夫致仕卒贈幽州都督

韋承慶字延休思謙之子也性謹畏事繼母爲篤孝擢進士第補雍王府參軍府中文翰悉委之王爲太子遷司議

郇儀鳳中詔太子監國太子稍嗜聲色與土功承慶見造
作玩好浮廣倡優鼓吹歡譁戶奴小人皆得親左右承顏
色恐因是作威福宜加繩察乃上疏極陳其端又進諭善
箴太子頗嘉納承慶嘗謂人所以擾濁浮躁本之于心乃
著靈臺賦譏揣當世亦自廣其志太子廢出爲烏程令累
遷鳳閣舍人掌天官選屬文敏無留思雖大詔令未嘗著
稿失大臣意出爲沂州刺史明堂災上疏諫以文明垂拱
後執政者未滿歲率以罪去大抵皆惡逆不道夫構大厦
濟巨川必擇文梓艤艫若亟毀而敗則是此朽木乘膠輿
也臣謂陛下求賢之意切而取人之路寬故一言有合而
付大任夫以堯舉舜猶歷試諸難况庸庸者可超處輔相
以百揆萬機畀小人哉書聞不報未幾復爲舍人掌選病
免改太子諭德歷豫號二州刺史有善政轉天官侍郎修

氏姓譜

卷十

五微

韋氏

壹

國史凡三掌選銓授平允議者公之長安中拜鳳閣侍郎
同鳳閣鸞臺平章事張易之誅承慶以素附離免冠待罪
時議草赦令咸推承慶名使爲之無撓色誤辭援筆而就
衆歎其壯然以累猶流嶺表歲餘拜辰州刺史未行以秘
書員外少監名監修國史封扶陽縣子詔撰武后紀聖文
中宗善之遷黃門侍郎未拜卒帝悼之名其弟相州刺史
嗣立會葬因拜黃門侍郎繼其位贈禮部尚書諡曰溫
韋嗣立字延構與兄承慶異母少友悌母遇承慶嚴每笞
輒解衣求代母不聽卽遣奴自捶母感寤爲均愛世比晉
王覽第進士累調雙流令政爲二川最承慶解鳳閣舍人
武后名嗣立謂曰爾父嘗稱二子忠且孝堪事朕比兄弟
稱職如而父言今使卿兄弟自相代卽拜鳳閣舍人時學
校廢刑濫及善人乃上書極陳永淳後庠序廢散胥子衰

缺儒學之官輕章句之選馳貴闕後生以微幸升業族平流以替業去垂拱間仕入彌多公行私謁選補逾濫經術不聞猛暴相夸陛下誠下明詔追三館生徒敕王公以下子弟一入太學尊尚師儒發揚勸獎海內知嚮然後審昇銓總各程所能以之臨人則官無曠民樂業矣又曰揚豫以來大獄屢興窮治連捕數年不絕大猾伺間陰相影會構似是之言正不赦之辜恣行楚慘類自誣服王公士人至連頸就戮道路藉藉咸知其非而鍛鍊已成不可翻動小則身誅大則族夷相緣共坐者庸可勝道彼皆報仇復嫌苟圖功求官賞耳臣願陛下廓天地之施雷雨之仁取垂拱以來罪無輕重所不赦者普皆原洗死者還官生者霑恩則天下瞭然知向所陷罪非陛下意也長安中拜鳳閣侍郎同鳳閣鸞臺平章事時州縣非其人后以爲憂李

氏姓譜

卷十

五微 韋氏

三

嶠唐休璟曰今朝廷重內官輕外職每除牧守皆訴不行非過累不得遣請選臺閣賢者分典大州自近臣始后曰誰爲朕行嗣立曰內典機要非臣所堪請先行以示羣臣后悅以本官檢校汴州刺史由是左肅政大夫楊再思等十八人悉補外未幾承慶知政事嗣立以成均祭酒徙魏洛二州政無它異坐善二張貶饒州長史由相州刺史入爲黃門侍郎轉太府卿修文館大學士中宗景龍中拜兵部尚書同中書門下三品時崇飾觀寺用度百出又恩侍食邑者衆封戶凡五十四州皆據天下上腴一封分食數州隨土所宜牟取利入至安樂太平公主率取高貲多丁家無復如平民有所損免爲封戶者亟于軍興監察御史宋務光建言願停徵封一切附租庸輸送不納嗣立建言今廩帑耗竭無一歲之儲假遇水旱人須賑給不時軍興

士待資裝陞下何以具之伏見營立寺觀累年不絕鴻侈繁麗務相矜勝大抵費常千萬以上轉徙木石糜功害農地藏開發蟄蟲傷露上聖至慈理必不然準之道法則乖質之生人則損陛下豈不是思又食封之家日月銀衆凡用戶部丁六十萬人課二絹則固一百二十萬臣見太府歲調絹纔百萬匹少則十之二有所貸免曾不半在比諸封家所入已寡國初功臣共定天下食封不三十家今橫恩特賜家至百四十以上天下租賦在公不足而私有餘又封家徵求各遣奴卑凌突侵漁百姓怨歎或贊易斷盜誅責紛紜曾無少息下民窶乏何以堪命臣願以丁課一送太府封家詣左藏仰給禁止自徵以息重困臣聞設官建吏本于治人而務安之也明官得其人則天下治古者取士先鄉曲之譽然後辟于州州已試然後辟五府五府

氏姓譜

卷十

五微 韋氏

三

著聞乃升諸朝得不謂所擇悉而所歷深乎今之取人未試而遽遷務進微幸比肩係踵故文者治官則回邪賦汙武者治軍則庸懦怯弱補授亡限員外置官吏困供承官竭資奉國家大事豈甚于此古者設爵待士才者有之不才者進則有才之路塞賢人據正遠僥倖之門僥倖開則賢者隱矣賢者隱則人不安國將危矣刺史縣令治人之首比年不加簡擇京官坐負及聲稱下者乃典州吏部年高不善刀筆者乃擬縣朝輕用人何以治國願下有司精加汰擇凡諸曹侍郎兩省二臺及五品以上清望官當先選用刺史縣令所冀守宰稱職以興太平帝不聽嗣立與韋后屬疏帝特詔附屬籍顧待甚渥營別第驪山鸚鵡谷帝臨幸命從官賦詩制序冠篇賜况優備因封嗣立逍遙公名所居曰清虛原幽棲谷嗣立獻木栢藤盤數十物唐

隆初拜中書令韋后敗幾死于亂寧王爲救免出爲許州刺史以定策立睿宗賜封百戶徙汝州入爲國子祭酒太子賓客坐宗楚客等削遺制事不執正貶岳州別駕再徙爲陳州刺史開元中河南道巡察使表其廉欲復用會卒年六十六贈兵部尚書諡曰孝初嗣立代承慶爲鳳閣舍人黃門侍郎承慶亦代爲天官侍郎及知政事父子並爲宰相世罕其比

韋恒嗣立之子也開元初爲碭山令政寬惠吏民愛之天子東巡州縣供張皆鞭朴趨辦恒不立威而事給姑子御史中丞宇文融薦恒有經濟才讓以其位擢殿中侍御史累轉給事中爲隴右河西黜陟使時河西節度使蓋嘉運恃左右援橫恣不法妄列功狀恒劾奏之人代其恐出爲陳留太守卒

氏姓譜

卷十

五徵 韋氏

六

韋濟恒之弟也開元初調郵城令或言吏部選縣令非其人既衆謝有詔問所以安人者對凡二百人惟濟居第一不能對者悉免官擢濟醴泉令侍郎盧從愿李朝隱並貶爲刺史濟四遷戶部侍郎爲太原尹著先德詩四章世服其典懿天寶中授尚書左丞凡三世居之濟文雅頗能修飾政事所至有治稱終馮翊太守子輿夏令亦以能政聞韋宏景嗣立之孫也擢進士第數佐節度府以左補闕召爲翰林學士蘇光榮爲涇原節度使宏景當草詔書辭不如旨罷學士累遷度支郎中張仲方黜李吉甫諡得罪憲宗意宏景撻助出爲綿州刺史李夷簡鎮淮南奏以自副召入再遷給事中駙馬都尉劉士涇賂權近擢太僕卿宏景上還詔書穆宗使喻其先人昌有功朕所以念功睦親者宏景固執帝怒使宣慰安南由是有名時蕭俛輔政宏

景議論常佐佑之還再遷吏部侍郎銓綜平序貴幸憚其
嚴不敢愆以私歷陝虢觀察使名拜倫普左丞駁正吏銓
所除六十餘官不當進資于是鄭綱丁公著楊嗣復皆奪
俸郎吏肅然望風修整吏部員外郎楊虞卿以累下吏詔
宏景與御史詳讞虞卿私造門宏景厲言曰有詔按公尙
私謁邪虞卿多朋助自謂必見納及是惶恐去遷禮部尙
書東都留守卒年六十六贈尙書左僕射宏景以直道進
議論持正有守當時風教所倚賴爲長慶名卿

韋挺京兆萬年人父冲事隋爲民部尙書挺少與隱太子
善高祖平京師署隴西公府祭酒累遷太子左衛驃騎檢
校左衛率太子遇之厚宮臣無與比武德七年帝避暑仁
智宮或言太子與宮臣謀逆又慶州刺史楊文幹坐大逆
誅辭連東宮帝專責宮臣由是挺與杜淹王珪等皆流越

氏姓譜

卷十

五徵

韋氏

元

雋未幾名拜主爵郎中貞觀初王珪數薦之遷尙書右丞
歷吏部黃門侍郎拜御史大夫扶陽縣男太宗謂挺曰卿
之任大夫獨朕意左右無爲卿地者挺曰臣驚下不足以
辱高位且非勳非舊而在藩邸故僚上願後臣以勸立功
者不聽是時承隋大亂風俗薄惡人不知教挺上疏曰父
母之恩昊天罔極割巨之痛終身何已今衣冠士族辰日
不哭謂爲重喪親賓來吊輒不臨舉又閭里細人每有重
喪不卽發問先造邑社待營辦具乃始發哀至假車乘雇
棺槨以榮送葬旣葬鄰伍會集相與酣醉名曰出孝夫婦
之道王化所基故有三日不息燭不舉樂之感今昏嫁之
初雜奏絲竹以窮宴歡官司習俗弗爲條禁望一切懲革
申明禮憲俄復爲黃門侍郎兼魏王泰府事時泰有寵太
子多過失帝密欲廢立語杜正倫正倫以漏言貶帝謂挺

曰不忍復置卿于法改太常卿初挺爲大夫時馬周爲監
察御史挺不甚禮及周爲中書令帝欲渝試用之周言挺
假于自用非宰相器遂止帝將討遼東擇主餉運者周言
挺才任粗使帝謂然挺父故爲營州總管嘗經畧高麗故
私藏家挺上之帝悅曰自幽距遼二千里無州縣吾軍靡
所仰食卿爲朕圖之苟吾軍用不乏是公之功其自擇文
武官四品十人爲子使取幽易平三州銳士若馬各二百
以從卽詔河北列州皆取挺節度許以便宜帝親解貂裘
及中廐馬賜之挺遣燕州司馬王安德行渠作漕艦轉糧
自桑乾水抵盧思臺行八百里渠塞不可通挺以方苦寒
未可進遂下米臺側厓之待凍泮乃運以爲解卽上言度
王師至食且足帝不悅曰兵寧拙速無工遲我明年師出
挺乃度它歲運何哉卽詔繁時令韋懷質馳按懷質還劾

氏姓譜

卷十

五徵

韋氏

罕

挺在幽州日置酒弗憂職不前視渠長利卽造船行粟縣
八百里乃悟非是欲進則不得還且水涸六師所須恐不
如陛下之素帝怒遣將作少監李道裕代之敕治書侍御
史唐臨馳傳械挺赴洛陽廩爲民使白衣從帝破蓋牟城
詔挺將兵鎮守示復用城與賊新城接日夜轉鬪無休時
挺以失職內不平作書謝所善公孫常常善數者也以它
事繫投囂死索橐中得挺書言所屯危感意怨望貶象州
刺史歲餘卒年五十八

歷代名賢列女氏姓譜卷之十一

湘鄉 蕭智漢雲澤氏纂輯

男秉信明甫氏校

上平聲

五微

韋氏

唐

韋仁壽京兆萬年人隋大業末為蜀郡司法書佐斷獄平得罪者皆自以韋君所論死無恨高祖入關遣使者徇定蜀承制擢仁壽雋州都督府長史南寧州納款朝廷歲遣使撫接至率貪沓邊人苦之多畔去帝素聞仁壽治理詔檢校南寧州都督寄治越雋詔歲一按行尉勞仁壽將兵五百人循西洱河開地數千里稱詔置七州十五縣酋豪皆來賓見即授以牧宰威令簡嚴人人安悅將還酋長泣

氏姓譜

卷一

五微

韋氏

一

曰天子藉公鎮撫奈何欲去我仁壽以池壁未立為解諸酋即相率築城起解甫旬畧具仁壽乃告以實曰吾奉詔第撫循庸敢擅留夷夏父老乃悲啼祖行遣子弟隨貢方物天子大悅仁壽請徙治南寧州假兵遂撫定詔可赦益州給兵護送刺史實軌疾其功詠言山獠方叛未可以遠畧不時遣歲餘卒

韋倫系本京兆父光乘在開元天寶間為朔方節度使倫以蔭調藍田尉幹力勤濟楊國忠署為鑄錢內作使判官國忠多發州縣齊人令鼓鑄督非所習雖釜扶苛嚴愈無功倫請準直募匠代無聊之人由是役用減鼓鑄多矣元宗晚節盛營官室吏介以為欺倫閱實工員省費倍從帝入蜀以監察御史為劍南節度行軍司馬矚頓判官時中人衛卒多侵暴尤難治倫以清儉自將西人賴濟中宦疾

之以讒貶衡州司戶參軍度支使第五琦薦倫才擢商州刺史荆襄道租庸使襄州裨將康楚元亂自稱東楚義王刺史王政棄城遁賊南襲江陵絕漢沔餉道倫調兵屯鄧州厚撫降賊寇益怠乃擊禽楚元以獻收租庸二百萬緡名爲衛尉卿俄兼寧隴二州刺史乾元中襄州亂詔倫爲山南東道節度使而李輔國方恣橫倫不肯謁憾之中罷爲秦州刺史吐蕃党項歲入邊倫兵寡數格虜敗貶巴州長史徙務川尉代宗立連拜忠台饒三州刺史宦者呂太一反嶺南詔拜倫韶州刺史韶連郴都團練使爲太一反間貶信州司馬斥棄十年客豫章德宗嗣位選使絕域者擢倫太常少卿充和吐蕃使倫至論天子威德贊普順悅乃入獻還進太常卿兼御史大夫再使如旨倫處朝數論政得失宰相盧杞惡之改太子少保從狩奉天及杞敗關

氏姓譜

卷十

五徽 韋氏

二

播罷爲刑部尚書倫在朝堂流涕曰宰相無狀使天下至此不失爲尚書後何勸聞者憚其公帝後欲復用杞爲制史倫苦諫言懇至到帝納之進太子少師郢國公致仕時李楚琳以僕射兼衛尉卿李忠誠以尚書兼少府監倫言楚琳逆節忠誠戎醜不當寵以官又請爲義倉以裨無年擇賢者任帝左右謂吐蕃豺虎野心不可事信約宜謹備邊帝善其言厚禮之居家以孝慈稱卒年八十三贈揚州都督諡曰肅

韋夏卿字雲客京兆萬年人少邃于學善文辭大歷中與弟正卿同舉賢良方正皆策高等授高陵主簿累遷刑部員外郎時仍歲旱蝗詔以郎官宰畿甸授奉天令課第一改長安令轉吏部員外郎郎中擢給事中出爲常蘇二州刺史徐州節度使張建封疾甚詔夏卿爲徐泗行軍司馬

且代之未至而建封卒徐軍立其子情爲留後各夏卿爲
吏部侍郎時從弟執誼在翰林嘗受人金有所干請密以
金內夏卿懷中夏卿毀懷不受曰吾與爾賴先人遺德致
位及此顧當是哉執誼大慙輔京兆尹太子賓客檢校工
部尚書爲東都留守辭疾改太子少保卒年六十四贈尚
書左僕射謚曰獻夏卿性通簡好古有遠韻談說多聞晚
歲將罷歸署其居曰天隱洞與齊映穆贊贊弟員友善雖
同游終年不見其喜慍撫孤姪恩踰已子爲政務通理不
甚作條教所辟士如路隋張賈李景儉等至宰相達官故
世稱知人

韋宏機京兆萬年人祖元禮隋浙州刺史宏機仕貞觀時
爲左千牛曹曹參軍使西突厥開拜同俄設爲可汗會石
國叛道梗三年不得歸裂裙錄所過諸國風俗物產爲西

氏姓譜

卷十一

五微 韋氏

三

征記比還太宗問外國事卽上其書帝大悅擢朝散大夫
累遷殿中監顯慶中爲檀州刺史以邊人陋僻不知文儒
貴乃修學官畫孔子七十二子漢晉名儒像自爲贊敦勸
生徒由是大化契苾何力討高麗次灤水會暴漲師留三
日宏機輸給資糧軍無飢高宗善之擢司農少卿主東都
營田苑宦者犯法杖乃奏帝嗟賞賜絹五十匹曰後有犯
治之毋奏遷司農卿太子宏薨詔蒲州刺史李冲寂治陵
成而元堂昵不容終具將更爲之役者過期不遣衆怨夜
燒營去帝詔宏機嗣作宏機令開隧左右爲四便房樽制
禮物裁工程不多改作如期而辦帝嘗言兩都我東西宅
然因隋宮室日仆不完朕將更作奈財用何宏機卽言臣
任司農十年省惜常費積三十萬緡以治宮室可不勞而
成帝大悅詔兼將作少府二官督營繕初作宿羽高山等

宮徙洛中橋于長夏門廢利涉橋人便之天子乃登洛北絕岸延眺良久歎其美詔卽其地營宮所謂上陽者尙書左僕射劉仁軌謂侍御史狄仁傑曰古天子陂池臺榭皆深宮複禁不欲百姓見之恐傷其心而今刻岸諺廊巨王城外豈愛君哉宏機猥曰天下有道百官奉職任輔弼者則思獻替事我乃府藏臣守官而已仁傑非之俄坐家人犯盜劾免官初東都方士朱欽遂爲武后所寵姦賊狼籍宏機曰欽遂假中宮驅策依倚形勢虧紊皇明爲禍亂之漸帝遣中使慰諭啟毋漏言遂欽遂于邊后恨之永淳中帝幸東都至芳桂宮召宏機使白衣檢校園苑將復任之爲后倚而止終檢校司農少卿事

韋實之名純避憲宗諱以字行後周柱國夏八世孫父摩大歷中爲中書舍人累上疏言得失爲元載所惡左遷京

氏姓譜

卷七

五徵 韋氏

四

兆少尹久之改秘書少監載曰肇若過我當擇善地處之終不肯詣載誅除吏部侍郎代宗欲相之會卒諡曰貞貫之及進士第爲校書郎擢賢良方正異等補伊闕渭南尉河中鄭元澤潞郟士美以厚幣召皆不應居貧噉豆糜白糲再遷長安丞或薦之京兆尹李實實舉笏示所記曰此其姓名也與我同里素聞其賢願識之而進于上或者喜以告曰子今日詣實而明日賀者至矣貫之唯唯不往官亦不遷永貞時始爲監察御史舉其弟纁自代及爲右補關纁代爲御史議者不謂之私宰相杜佑子從郁爲補關貫之與崔羣持不可換左拾遺復奏拾遺補關爲諫官等宰相政有得失使從郁議是子而議父殆不可訓卒改宅官遷禮部員外郎新羅人金忠義以工巧幸擢少府監蔭子補齋郎貫之不與曰是將奉郊廟祠祭階爲守宰者安

可以賤工子爲之又劾忠義不宜汙朝籍忠義竟罷于是
權幸側目進吏部員外郎坐考賢良方正牛僧孺等策獨
署奏出爲果州刺史半道貶巴州久之召爲都官郎中知
制誥進中書舍人宰相裴垪嘗三奏事憲宗不從貫之曰
公亦以進退決請乎垪曰奉教事果見聽垪因曰君異時
當位于此改禮部侍郎所取士抑浮華先行實于時流競
爲息嘗從容奏曰禮部侍郎重于宰相帝曰侍郎是宰相
除安得重曰然爲陛下陳宰相者得無重乎帝美其言改
尚書右丞俄同中書門下平章事遷中書侍郎討吳元濟
也貫之請釋鎮州專力淮西且言陛下豈不知建中事乎
始于蔡急而魏應也齊趙同起德宗引天下兵誅之物力
殫屈故朱泚乘以爲亂此非佗速于撲滅也今陛下獨不
能少忍俟蔡平而誅鎮邪時帝業已討鎮不從終之蔡平

氏姓譜

卷十一

五徽 韋氏

五

鎮乃服初討蔡以宣武韓宏爲都統又詔河陽烏重胤忠
武李光顏合兵以進貫之諫諸將戰方力今若置都統又
令二帥連營則各持重養成未可歲月下也亦不從後四
年乃克蔡皆如貫之策云帝以段文昌張仲素爲翰林學
士貫之謂學士所以備顧問不宜專取辭藝奏罷之皇甫
錡張宿皆以幸進宿使淄青裴度欲爲請銀緋貫之曰宿
姦佞吾等縱不能斥奈何欲假以寵乎由是宿等恐陰搆
之又與度論兵帝前議頗駁故罷爲吏部侍郎于是翰林
學士左拾遺郭求上疏申理詔免求學士出貫之爲湖南
觀祭使不三日韋覲李正辭薛公幹李宣韋處厚崔韶坐
與貫之厚善悉貶爲州刺史覲正辭處厚皆清正以鉤黨
去由是中外始大惡宿時國用不足遣鹽鐵副使程异督
諸道租賦异諷州縣厚歛以獻貫之不忍橫賦而所獻不

中异意因取屬內六州留錢繼之左遷太子詹事分司東都穆宗立卽拜河南尹以工部尚書名未行卒年六十二贈尚書右僕射諡曰貞後更諡曰文貫之沉厚寡言與人交終歲無欸曲不爲僞辭以悅人爲右丞時內僧造門曰君且相貫之命左右引出曰此妄人也居輔相嚴身律下以正議裁物室居無所改易裴均子持萬緡請撰先銘答曰吾寧餓死豈能爲是哉生平未嘗通饋遺故家無羨財韋處厚字德載京兆萬年人事繼母以孝聞親歿廬墓終喪中進士第又擢才識兼茂科授集賢校書郎舉賢良方正異等宰相裴垍引直史館改咸陽尉憲宗初擢左補闕禮部尚書李絳請間言古帝王以納諫爲聖拒諫爲昏今不聞進規納忠何以知天下事帝曰韋處厚路隋數上疏其言忠切顧卿未知耳由是中外推其靜密歷考功員外

氏姓譜

卷十

五徵

韋氏

六

郎坐與宰相韋貫之善出開州刺史以戶部郎中入知制誥穆宗立爲翰林侍講學士處厚以帝冲怠不向學卽與路隋合易書詩春秋禮孝經論語掇其粹要題爲六經法言二十篇上之冀助省覽帝稱善竝賜金幣再遷中書舍人張平叔以言利得幸于帝建言官自鬻鹽籠天下之財宰相不能詰下羣臣議處厚發十難誦其迂謬平叔愧縮遂寢敬宗初李逢吉得柄構李紳逐爲端州司馬其黨劉栖楚等欲致紳必死建言當徙醜地處厚上言按紳先朝舊臣就令有過尙當宥瑕洗釁成無改之美况被讒乎紳由是免逢吉怒至寶歷三月赦書不言左降官未量移者以沮紳內徙處厚復奏逢吉緣紳一人而使近歲流斥皆不蒙澤非所以廣恩于天下帝悟追改其修進翰林承旨學士兵部侍郎方天子荒暗月視朝才三四處厚入見卽

自陳有罪願前死以謝帝曰何哉對曰臣昔爲諫官不能
死爭使先帝因畋與色而至不壽于法應誅然所以不死
者陛下在春宮十有五矣今皇子方襁褓臣不敢避死亡
之誅帝大感悟賜錦綵以慰其意王廷湊之亂帝歎宰相
不才而使姦臣跋扈處厚曰陛下有一裴度不能用乃當
饋而歎恨無蕭曹此馮唐所以謂漢文帝有頗牧不能用
也後禁中急變文宗綏內難猶豫未卽下詔處厚入昌言
曰春秋大義滅親內惡必書以明逆順正名討罪何所避
諱哉遂奉教班諭是夕號令及它儀矩不暇責有司一出
處厚無違舊章者進拜中書侍郎同中書門下平章事封
靈昌郡公堂史湯鉢數指權納賂處厚笑曰此半滑渙
也斥出之相府肅然初貞元時宰相齊抗奏罷州別駕及
當爲別駕者引處之朝元和後兩河用兵裨將立功得補

氏姓譜

卷上

五微 韋氏

七

東宮王府官朱紫滄並授受不綱處厚乃置六雄十望十
緊等州悉補別駕由是流品澄別帝雖自力機政然驟信
輕改搖于浮論處厚嘗獨對曰陛下不以臣不肖使待罪
宰相凡所奏可中輒變易自上心出邪乃示臣不信得于
橫議邪卽臣何名執政且裴度元勳舊德輔四朝實易直
長厚忠實經事先帝陛下所宜親重委信之臣乃陛下自
擢今言不見納宜先罷卽趨下頓首帝矍然曰何至是卿
之忠力朕自知之安可遽辭以重吾不德處厚趨出帝復
名問所欲言乃對近君子遠小人始可爲治諄復數百言
又言裴度忠可久任帝嘉納之自是無復橫議者時李同
捷叛詔諸軍進討魏博史憲誠懷向背裴度待以不疑憲
誠遣吏白事中書處厚名語曰晉公以百口保爾卽于天
子我則不然正須所爲以邦法從事耳憲誠懼不敢貳卒

有功李載義數破滄鎮兵皆剝剔以獻處厚戒之前後完活數百千人太和二年方奏事暴疾仆香案前帝命中人翼扶之輿還第一夕薨年五十六贈司空處厚姿狀如甚懦者居家亦循易至廷爭嶽然不可回奪剛于御吏百僚謁事畏惕未嘗敢及以私推擇官材往往棄瑕錄善時亦譏其太廣性嗜學家書讎正至萬卷爲拾遺時謨德宗實錄後又與路隋共次憲宗實錄詔分日入直創具凡例未及成而終本名淳避憲宗諱改今名

韋湊字彥宗京兆萬年人祖叔諸貞觀中爲庫部郎中與弟吏部郎中叔謙兄主爵郎中季武同省時號三列宿湊永淳初解褐夔州參軍事徙資州司兵觀察使房昶才之表于朝遷揚州法曹州人孟神爽罷仁壽令豪縱數犯法交通貴戚吏莫敢繩湊按治杖殺之遠近稱服入爲相王

氏姓譜

卷士

五徵

韋氏

八

府屬時姚崇兼府長史嘗曰韋子識遠文詳吾恨晚得之六遷司農少卿忤宗楚客出爲貝州刺史睿宗立授鴻臚少卿徙太府兼通事舍人時改葬故太子重俊有詔加諡又詔雪李多祚等罪議贈官湊上言臣伏見故太子與多祚等擁北軍犯宸居破扉斬關兵指黃屋騎騰紫微和帝御元武門親諭逆順太子據鞍自若督衆不止逆黨悔非回兵執賊多祚伏誅太子乃遁去明日帝見羣臣涕數行下曰幾不與公等相見其爲危甚矣臣子之禮過位必趨感路馬劬有誅昔漢成帝爲太子行不敢絕馳道秦師免胄過周北門王孫滿策其必敗推此則太子稱兵宮中爲悖已甚以斬武三思父子而嘉之乎則弄兵討逆以安君父可也因欲自立則是爲逆又奚可褒此時韋氏逆未明義未絕于太子母也子無廢母之理非中宗命廢之則又

切父廢母且君或不君臣安可不臣父或不父安可不
子晋太子申生諡曰恭漢太子據諡曰戾今太子乃諡節
閔臣所未諭願與議諡者質于御前使臣言非邪甘鼎獲
之誅申大義示天下臣言是邪咸蒙冰釋不復異議如曰
未然奈何使後世亂臣賊子資以爲辭宜易諡以合經禮
多祚等罪云免而不云雪帝瞿然引內閣中勞曰誠如卿
言業已爾奈何對曰太子實逆不可以褒請質行以諡時
大臣亦重改惟罷多祚等贈官景雲初作金仙等觀湊諫
以爲方農月興功雖賞出公主然高直售庸則農人捨耕
取顧趨末棄本恐天下有受其飢者不聽湊執爭以萬物
生育草木昆蚊傷伐甚多非仁聖本意帝詔外詳議中書
令崔湜侍中岑羲曰公敢是邪湊曰食厚祿死不敢顧况
聖世必無死乎朝廷爲減費萬計出爲陔汝岐三州刺史

氏姓譜

卷土

五微

韋氏

九

開元初欲建碑靖陵湊以古園陵不立碑又方旱不可興
工諫而止遷將作大匠詔復孝敬皇帝廟號義宗湊諫曰
孝敬皇帝未嘗南面且別立寢廟無稱宗之義遂罷遷右
衛大將軍元宗謂曰故事諸衛大將軍與尚書更爲之近
時職輕故用卿以重此官其毋辭尋徙河南尹封彭城郡
公會洛陽主簿王鈞以賊抵死詔曰兩臺御史河南尹縱
吏侵漁春秋重責帥其出湊曹州刺史侍御史張洽通州
司馬久之遷太原尹兼北都軍器監邊備修舉詔賜時服
勞勉之及病遣上醫臨治卒年六十五贈幽州都督諡文
韋見素字會微湊之子也質性仁厚及進士第授相王府
參軍襲父爵擢累諫議大夫天寶五年爲江西南黔中
嶺南道黜陟使繩糾吏治所至震畏遷文部侍郎平判皆
誦于口銓叙平允官有丐求輒下意聽納人多德之十三

載元宗苦雨潦闕六旬謂宰相非其人罷左相陳希烈詔楊國忠審擇大臣時吉溫得幸帝欲用之溫爲安祿山所厚國忠懼其進沮止之諫于中書舍人竇華宋昱皆以見素安雅易制國忠入白帝帝亦以相王府屬有舊恩遂拜武部尚書同中書門下平章事集賢院學士知門下省事明年祿山表請蕃將三十二人代漢將帝許之見素不悅謂國忠曰祿山反狀暴天下今又以蕃代漢難將作矣國忠不應見素曰知禍之牙不能防見禍之形不能制焉用彼相明日當愁諭之旣入帝迎諭曰卿等有疑祿山意邪國忠見素趨下流涕具陳祿山反明甚詔復位因以祿山表置帝前乃出帝令中官袁思藝傳詔曰此姑忍朕徐圖之由是奉詔然每進見未嘗不爲帝言之帝不入其語未幾祿山反從帝入蜀陳元禮之殺國忠也兵傷其首衆傳

氏姓譜

卷十

五微 韋氏

十

聲曰毋害韋公父子獲免帝令壽王賜藥傳劄次巴西詔兼左相封幽國公肅宗立與房琯崔渙持節奉傳國璽及冊宣揚制命帝曰太子仁孝去十三載已有傳位意屬方水旱左右勸我且須豐年今帝受命朕如釋負矣煩卿等遠去善輔導之見素涕泣拜辭又命見素于諤及中書舍人賈至爲冊使判官謁見肅宗于順化郡肅宗聞琯各且舊虛懷待之以見素嘗附國忠禮遇獨減是歲十月丙申有星犯昴見素言于帝曰昴者胡也天道謫見所應在人祿山將死矣帝曰日月可知乎見素曰福應在德禍應在刑昴金忌火行當火位昴之昏中乃其時也旣死其月亦死其日明年正月甲寅祿山其噎乎帝曰賊何等死答曰五行之說子者視妻所生昴犯以丙申金木之妃也木火之母也丙火爲金子申亦金也二金本同未異還以相尅

賊始爲子與首亂者更相屠戮乎及祿山死日月皆驗明年三月至鳳翔拜尚書右僕射罷知政事初行在所承喪亂後兵吏三銓簿領燭散選部文符僞濫帝欲廣懷士心至者一切補官不加檢復見素奏宜明條綱以爲持久帝未及從既還都選者猥集補署無所日訴于朝乃追行其言會郭子儀亦爲僕射徙見素太子太師詔至蜀郡奉迎太上皇以功食實封三百戶上元初以疾求致仕許之詔朝朔望寶應元年卒年七十六贈司徒諡忠貞

見素之子也歷京兆府司錄參軍楊國忠之死軍聚不解陳元禮請殺貴妃以安衆帝意猶豫諤曰臣聞以計勝色者昌以色勝計者亡今宗廟震驚陛下棄神器奔草莽惟割恩以安社稷因叩頭流血帝寤賜妃死軍乃大悅擢諤御史中丞爲置頓使乘輿將行或曰國忠死不可

氏姓譜

卷十一

五敬 韋氏

士

往蜀請之河隴或請幸太原朔方涼州或曰如京師雖然不一帝心向蜀未能言諤曰今兵少不能捍賊還京非萬全計不如至扶風徐圖去就帝問于衆衆然之遂至扶風乃決西幸後終給事中

韋顓字周仁諤弟益之子早孤事姊恭順及長身不衣帛通陰陽象緯博知山川風俗論議典據以門調補千牛備身自鄴尉判入等授萬年尉歷御史補闕與李約李正辭更進諷諫數移大事裴垪韋貫之李絳崔羣蕭俛皆布衣舊繼爲宰相朝廷典章多所資逮嘗曰吾儕五人智不及一韋公長慶初爲大理少卿累遷給事中敬宗立授御史中丞爲戶部侍郎徙吏部卒贈禮部尚書所著易緼解推演終始有深誼既喜接士後出莫不造門節儉自居天下推其尚云

韋維字文紀叔謙孫進士對策高第擢武功主簿督役乾陵會歲飢均力勸功人不知勞坐徐敬業親貶五泉主簿徙內江令教民耕桑縣爲刻頌遷戶部郎中善裁剖時員外宋之間善詩故時稱戶部二妙終太子右庶子

韋繩維之弟也長文辭撫養宗屬孤幼無異情舉孝廉以母老不肯仕踰二十年乃歷長安尉威行京師擢監察御史更泗涇鄜三州刺史天寶初入爲秘書少監元宗尙文

視其職如尙書丞郎繩刊是圖簡以善職稱終陳王傅韋虛心字無逸維子舉孝廉遷大理丞侍御史神龍中按

大獄僕射實懷貞侍中劉幽求有所輕重虛心据正不撓景龍中屬羌叛旣禽捕有詔悉誅虛心惟論酋長死原活

其餘遷御史中丞歷荆潞揚三大都督府長史荊州有鄉豪負勢干法虛心籍其訾入之官以廬江多盜遂縣舒城

氏姓譜

卷十一

五微

韋氏

十一

盜賊爲哀入爲工部尙書東京留守累封南皮郡子卒贈揚州大都督諡曰正弟虛舟歷洪魏二州刺史有治名人爲刑部侍郎初維爲郎蒔柳于廷及虛心兄弟居郎省對之輒歛容自叔謙後至郎中者數人世號郎官家

韋表微字子明隋鄆城公元禮七世孫羈州能屬文母訓諭稍厲輒不敢食以是未嘗讓責韋皋鎮西川王緯司空

曙獨孤良弼裴浼居幕府皆厚相推挹浼嘗謂表微似衛玠自以不能及也擢進士第數辟諸使府久之入授監察

御史裏行不樂曰爵祿譬滋味也人皆欲之吾年五十拭鏡擲白冒游少年間取一班一級不見其味也將爲松菊

主人不愧陶淵明云俄爲翰林學士是時李紳忤宰相貶端州龐嚴蔣防皆謫去學士缺人人爭薦丞相所善者表

微獨薦韋處厚人服其公進知制誥後與處厚議增選學

士復薦路隋處厚以諸父事表徵因曰隋位崇入且居翁
右奈何答曰選德進賢初不計私也久之遷中書舍人敬
宗嘗語左右欲相二韋會朋文宗立獨相處厚進表徵戶
部侍郎刁志洛叛詔李聽率師討之次河上天子憂無成
功表徵曰以聽軍勢不十五日必破賊及捷書上止浚日
志洛殘兵六千奔昭義宰相請推處首惡者誅之歸脅從
者于魏表徵上言逆子降又殺之非好生也請以聽代史
憲誠于魏志洛之徒可使招納不聽以病癩罷學士卒年
六十贈禮部尚書始被病醫藥不能具所居堂寢隘陋既
歿帛客咨嗟篤故舊雖庸下與攜手語笑無間然尤好春
秋病諸儒執一概是非紛然著三傳總例完會經趣又以
學者薄師道不如聲樂賤工能尊其師著九經師授譜詆
其違

氏姓譜

卷十一

五徵

韋氏

三

韋景駿司農少卿宏機孫中明經神龍中歷肥鄉令縣北
灑漳連年泛溢人苦之舊防洩漕渠雖峭岸隨即壞決景
駿相地勢益南干步因高築障水至隄趾輒去其北燥爲
腴田又雜糴以梁其上而廢長橋功少費約後遂爲法方
河北饑身巡閭里勸人通有無教導撫循縣民獨免流散
及去人立石著其功後爲貴鄉令有母子相訟者景駿曰
令少不天常自痛耳幸有親而忘孝邪教之不孚令之罪
也因嗚咽流涕付授孝經使習大義于是母子感悟請自
新遂爲孝子後數年爲趙州長史道出肥鄉民喜爭奉酒
食迎犒有小兒亦在中景駿曰方兒曹未生而吾去邑非
有舊恩何故來對曰耆老爲我言學廬館舍橋郭皆公所
治意公爲古人今幸親見所以來景駿爲留終日後遷房
州刺史州窮險有蠻夷風無學校好祀淫鬼景駿爲諸生

貢舉通隘道作傳舍罷祠房無名者景駿之治民求所以便之類如此轉奉天令未行卒

韋述宏機曾孫家尉書二千卷述爲兒時誦憶畧徧父景駿景龍中爲肥鄉令述從到官元行冲景駿姑子也爲時儒宗常載書數車自隨述入其室觀書不知寢食行冲異之試與語前世事熟復詳諦如指掌然使屬文受紙輒就行冲曰外家之寶也舉進士時述方少儀質陋悅考功員外郎宋之問曰童子何業述曰性嗜書所撰唐春秋三十篇恨未畢它惟命之問曰本求茂才乃得遷囹遂上第開元初爲櫟陽尉秘書監馬懷素奏述與諸儒卽秘書續七志五年而成述好講學見柳冲所撰姓族系錄每私寫懷之還舍則及繕錄故于百氏源派爲詳乃更撰開元譜二千篇累除右補闕張說旣領集賢院薦述爲直學士遷起

氏姓譜

卷十一

五微 韋氏

古

居舍人從封泰山奏東封記有詔褒美先是詔修六典徐堅構意歲餘歎曰吾更修七書而六典歷年未有所適及蕭嵩引述撰定述始摹周六官官領其屬事歸于職規制遂定初令狐德棻吳兢等撰武德以來國史皆不能成述因二家參以後事遂分紀傳又爲例一篇嵩欲早就復奏起居舍人賈登著作佐郎李銳助述納績逮成文約事詳蕭穎士以爲譙周陳壽之流改國子司業充集賢學士累遷工部侍郎封方城縣侯述典掌圖書餘四十年任史官二十年滄榮利爲人純厚長者當世宗之接士無貴賤與均蓄書二萬卷皆手校定黃墨精謹內秘書不逮也古草隸帖秘書古器圖譜無不備安祿山亂剽失皆盡述獨抱國史藏南山身陷賊汚僞官賊平流渝州爲刺史薛舒所困不食死廣德初甥蕭直爲李光弼判官詣闕奏事稱旨

因理述倉卒犇逼能存國史賊平盡送史官于休烈以功
補過宜蒙恩宥有詔贈右散騎常侍韋氏之顯者孝友詞
學則承慶嗣立邃音樂有萬石達禮儀則叔夏史才博識
有述所著書二百餘篇行于世弟迨迪學業亦亞述與迨
對爲學士與迨竝禮官縉紳高之時趙冬曦兄弟亦各有
名張說嘗曰韋趙兄弟人之杞梓云

韋丹字文明京兆萬年人周大司空孝寬六世孫高祖現
以洗馬事太子承乾諫不聽太宗才之擢給事中高宗在
東宮爲中舍人封武陽縣侯孝敬爲太子現以右中護爲
詹事卒贈秦州都督諡曰貞丹早孤從外祖顏真卿學擢
明經調安遠令以讓庶兄入紫閣山事從父能復舉五經
高第歷咸陽尉張獻甫表佐邠寧幕府順宗爲太子以殿
中侍御史名爲舍人新羅國君死詔拜司封郎中往吊故

氏姓譜

卷七

五微 韋氏

五

事使外國賜州縣十官賣以取貲號私覲官丹曰使外國
不足于貲宜上請安有賀官受錢卽具疏所宜費帝命有
司與之因著令未行而新羅立君死還爲容州刺史教民
耕織止惰游興學校民貧自鬻者贖歸之禁吏不得掠爲
隸始城州周十三里屯田二十四所教種茶麥仁化大行
遷河南少尹未至徙義成軍司馬以諫議大夫名有直名
劉闢反議者欲釋不誅丹上疏以爲孝文世法廢人慢當
濟以威今不誅闢則可使者惟兩京耳憲宗褒美會闢圍
梓州乃授丹劍南東川節度使代李康至漢中上言康守
方盡力不可易名還議蜀事闢去梓因以讓高崇文乃拜
晉慈隰州觀察使封咸陽郡公閱歲自陳所治三州非要
害地不足張職爲國家費不如屬之河東帝從之徙爲江
南西道觀察使丹計口受俸委餘于官罷八州冗食者收

其財始民不知爲瓦屋草茨竹椽久燥則憂而焚丹名工
教爲陶聚村于場度其費爲估不取贏利人能爲屋者受
材瓦于官免半賦徐取其償逃未復者官爲爲之貧不能
者異以財身往勸督置南北市爲營以舍軍歲中早募人
就功厚與直給其食爲衢南北夾兩營東西七里以廢倉
爲新廐馬息不死築隄扞江長十二里竇以疏漲凡爲陂
塘五百九十八所灌田萬二千頃有吏主倉十年丹覆其
糧亡三千斛丹曰吏豈自費邪籍其家盡得文記乃權吏
所奪丹名諸吏曰若恃權取于倉罪也與若期一月還之
皆頓首謝及期無敢違有卒違令當死釋不誅去上書告
丹不法詔丹解官待辨會卒年五十八驗卒所告皆不實
丹治狀愈明大和中裴誼觀察江西上言爲丹立祠堂刻
石紀功不報宣宗讀元和實錄見丹政事卓然它日與宰

氏姓譜

卷十一

五微 韋氏

六

相語元和時治民孰第一周墀對臣嘗守江西韋丹有大
功德被八州歿四十年老幼思之不忘乃詔觀察使紇于
泉上丹功狀命刻功于碑子宙推蔭累調河南府司錄參
軍李珣表河陽幕府宣宗謂宰相周墀曰丹有子否以宙
對帝曰與好官乃拜侍御史三遷度支郎中盧鈞節度太
原表宙爲副是時回鶻已破諸部入塞下剽殺吏民鈞欲
得信重吏視邊宙請往自定襄鴈門五原絕武州塞畧雲
中踰旬注徧見酋豪鷙論之視亭障守卒增其稟約吏不
得擅以兵侵諸戎犯者死于是三部六蕃諸種皆信悅名
拜吏部郎中出爲永州刺史州方災歉乃斥官下什用所
以供制吏者得九十餘萬錢爲市糧餉俗不知法多觸罪
宙爲書制律并種植爲生之宜戶給之州負嶺轉餉艱險
每饑人輒率死宙始築常平倉收穀羨餘以待乏罷冗役

九百四十四員縣舊置吏督賦宙俾民自輸家十相保常
先期湘源生零陵香歲市上供人苦之宥爲奏罷民貧無
牛以力耕宙爲置社二十家月會錢若干探名得者先市
牛以是爲準久之牛不乏立學官取仕家子弟十五人充
之初俚民婚出財會賓客號破酒晝夜集多至數百人貧
者猶數十力不足則不迤至淫奔者宙條約使畧如禮俗
遂改邑中少年常以七月擊鼓羣入民家號行盜皆迎爲
辦具謂之起益後爲解素喧呼痕鬪宙至一切禁之還爲
大理少卿久之拜江西觀察使政簡易南方以爲世官遷
嶺南節度使南詔陷交趾撫兵積備以幹聞加檢校尙書
左僕射同中書門下平章事咸通中卒宙弟岫字伯起亦
有名

韋澳字子裴貫之之子也第進士復擢宏辭方靜寡欲十

氏姓譜

卷十一

五徽

韋氏

七

年不肯調御史中丞高元裕與其兄温善欲薦用之諷澳
謁已温歸以告澳不答温曰元裕端士若輕之邪澳曰然
恐無呈身御史周墀節度鄭滑表署幕府會墀入胡私謂
曰何以教我澳曰願公無權墀愕貽澳曰爵賞刑罰人主
之柄公無以喜怒行之俾庶官各舉其職則公歛衽廟堂
上天下治矣烏用權墀歎曰吾先居此得無愧乎擢考功
員外郎史館修撰歲中知制誥召爲翰林學士累遷兵部
侍郎進學士承旨與蕭資皆爲宣宗禮遇每兩人直必偕
召問政得失嘗夜被旨草詔書事有不安者卽遷延須見
帝闕陳可否未嘗不順納一日召入屏左右問曰朕于敕
使何如澳陳帝威制前世無以帝搖首曰未也策安出澳
倉卒答曰若謀之外廷則太和事可用追鑿不若就擇可
在者與計事帝曰朕固行之矣自黃至綠自綠至緋猶可

衣紫卽合爲一矣。澳愧汗不能對，乃罷。收京兆尹帝舅鄭光主墅，吏豪肆積年不輸官賦，澳逮繫之。它日延英帝問其改澳具道姦狀，且言必真。以法帝曰：「可貸否？」答曰：「陛下百內署擢臣尹京邑，安可使畫一法獨行于貧下乎？」帝入白太后曰：「是不可犯，后爲輸租乃免，由是豪右斂跡。會戶部闕，判使帝以問澳，澳三不對。帝曰：「任卿可乎？」臣老矣，力疲氣耗，煩劇非所任者。帝默不樂出，謂其甥柳曰：「吾本不爲宰相，知上使委以使務，脫謂吾佞，岐而得無以自白。今時事浸惡，皆吾輩貪爵位致然，未幾授河陽節度使，入辭。帝曰：「卿自便而遠我，非我去卿。」懿宗立，徙平盧軍入爲吏部侍郎，復出爲邠寧節度使，宰相杜審權素不悅，坐吏部時，史盜簿書爲姦，貶秘書監分司。東都就遷河南，尹辭疾不拜，旬歸。樊川逾年以吏部侍郎召不起，卒。贈戶

氏姓譜

卷七

五微

韋氏

六

部尚書諡曰貞澳，在河陽累年，宣宗遣使至魏博道出澳所，帝以簿紙手作詔賜澳，曰：「密飭裝秋，當見卿，蓋將以爲相也。因問輔養術，澳具言金石非可御，方士怪妄宜斥遠之。其八月帝崩，不果相，爲學士。時帝嘗曰：「朕每遣方鎮刺史，欲各悉州郡風俗者，卿爲朕撰一書。」澳乃取十道四方志，手加紬次，題爲處分語。後鄧州刺史薛宏宗中謝帝敕戒州事，人人驚服。

韋綬貫之之兄也。舉孝廉，又貢進士。禮部侍郎潘炎將以爲舉，首綬以其友楊凝親老故讓之，不對策。輒去，凝遂及第。後擢明經，辟東都幕府。德宗時以左補闕爲翰林學士，密政多所參逮。帝常幸其院，韋如從，會綬方寢，學士鄭絀欲馳告之，帝不許。時大寒，以妃蜀襖袍覆而去。其待遇若此。每入直，踰月不得休，以母老屢旬解職，每請帝輒不悅。

出入八年而性謹畏甚晚乃感心疾罷還第不極于用九月九日帝爲黃菊歌顧左右曰安可不示韋綬卽遣使持往綬遽奉和附使進帝曰爲文不已豈頤養邪較自今勿復爾終左散騎常侍弟纒有精識爲士林器許兄弟皆名重當時

韋溫字宏育綬之子方七歲日誦書數千言十一舉兩經及第以拔萃高等補咸陽尉父愕然疑假權謁進名而試諸廷文就無留思喜曰兒無愧矣入爲監察御史以臺制苛嚴不可以省養不拜換著作郎旣謝輒解歸侍親疾調適湯劑彌二十年衣不弛帶居喪毀瘠不支服除李逢吉辟置宣武府頗遷右補闕宰相宋申錫被構罪不測溫倡曰丞相操履有初不宜反乃姦人陷之吾等豈避雷霆使上蒙霧咎邪率同舍伏閣切爭由是益知名太和五年太

氏姓譜

卷十一

五微

韋氏

九

廟室漏簿諸宗正將作營治不時畢文宗怒責卿李銳監玉堪奪其稟自赦中人葺之溫諫吏舉其職國以治事歸于正法以修夫設制度立官司度經費則宗廟最重也比詔下閱月有司弛墮不力正可黜慢官懲不恪擇可任者繕完之則吏舉職事歸正矣今慢吏奪稟而易以中人是許百司公廢職以宗廟之重爲陛下所私臣竊惜之請還將作則官修業矣帝乃罷宦人會羣臣請上尊號溫固諫今河南水江淮旱歉京師雪積五尺老稚凍仆此非崇飾虛名時帝順納乃謝羣臣改侍御史李德裕入輔擢禮部員外郎或言雅爲牛僧孺厚德裕曰是子堅正可以私廢乎鄭注節度鳳翔表爲副溫曰拒則遠黜從之禍不測吾焉能爲注起邪注誅由考功員外郎拜諫議大夫未幾爲翰林學士先是綬在禁廷積憂畏病發故誠溫不得任近

職至是固辭帝怒曰寧殺治命邪禮部侍郎崔蠡曰溫用
亂命益所以爲孝帝意釋換知制誥引疾徙太常少卿宰
相李固言薦溫給事中帝曰溫素避事肯爲我論駁乎須
太子長以爲賓客久之卒爲給事中初兼莊恪太子侍讀
晨詣宮日中見太子諫曰殿下盛年宜雞鳴早作問安天
子如文王故事太子不悅辭侍讀見聽王晏平罷靈武節
度使以馬及鎧仗自隨貶康州司戶參軍厚賂貴近浹日
改撫州司馬樂工尉遲璋授光州長史溫悉封上詔書太
子得罪詔諭羣臣溫曰陛下訓之不早非獨太子罪時頗
直其言遷尙書右丞鹽鐵推官姚勗按大獄帝以爲能擢
職方員外郎將趨省溫使戶止卽上言卽官清選不可賞
能吏帝命中人諭送溫執議不移詔改勗檢校禮部郎中
帝問故于楊嗣復對曰勗名臣後治行無疵若吏材幹而
氏姓譜

卷七

五微 韋氏

子

不入清選佗日孰肯當劇事者此衰晉風不可以法帝素
重溫出爲陝虢觀察使民當輸租而麥未熟吏白督之溫
曰使民貨田中穗以供賦可乎爲緩期而賦辦武宗立擢
吏部侍郎李德裕欲引同輔政溫苦言李漢可釋德裕悵
然出宣歙觀察使池民訟刺史劾無狀榜殺之威行部中
旣疾名親屬賦綬詩在室愧屋漏因泣下曰今知沒身不
負斯誠矣卒年五十八贈工部尙書諡曰孝溫性剛峻人
望見無敢戲慢者與楊嗣復李珣善嘗勸與李德裕平故
憾二人不從及皆謫溫歎曰用吾言孰至是邪溫少合所
善惟蕭祐祐夷澹君子也故溫號山林友云

韋臯字城武京兆萬年人六代祖範有勲力周隋開皋始
任爲建陵挽郎諸帥府更辟擢監察御史張鑑節度鳳翔
署營田判官以殿中侍御史知隴州行營留事德宗狩奉

天李楚琳殺鎰劫衆叛歸朱泚隴州刺史郝通奔降楚琳始泚以范陽軍鎮鳳翔旣歸節而留兵五百戍隴上以部將牛雲光督之至是雲光謀請皋爲帥將劫以臣泚別將翟暉伺知以白皋雲光懼不克率衆出奔至汧陽遇泚奴使皋所謂雲光曰太尉已爲天子使我以御史中丞授皋若聽固吾人也不受可遂誅之請以兵俱許之皋迎勞先納奴僞受泚詔卽讓雲光曰旣去而復何也對曰尙未知公之命故去今還願與公同生死皋曰大使固善苟無它圖請釋甲以安衆而後可入也雲光以皋諸生無能爲乃命士委仗鎧皋受而內其卒明日置酒大會奴雲光與其下至皋伏甲左右廡酒行盡殺之以其首徇泚復使它奴拜皋鳳翔節度使皋亦斬之及從騎三人縱一人使報泚帝聞授皋隴州刺史置奉義軍拜節度使寵其功皋遣兄

氏姓譜

卷十

五微

韋氏

三

平及弁繼至奉天士氣益壯乃築壇血牲與士盟曰協力一心以誅元惡有渝此盟神其殛之又馳使吐蕃與連和隴抵遂安帝自梁洋還名爲左金吾衛將軍遷大將軍貞元初代張延賞爲劍南西川節度使初雲南蠻羈附吐蕃其盜塞必以蠻爲鄉道皋計得雲南則斬虜右支乃聞使招徠之稍稍通西南夷明年蠻大首領苴那時以王爵讓其兄子烏星始烏星幼那時攝領其部故請歸爵皋上言禮讓行于殊俗則拂戾者化願皆封以示褒進詔可又明年雲南欵邊求內屬約東蠻鬼主驃傍苴夢衝等絕吐蕃盟五年東蠻斷瀘水橋攻吐蕃請皋濟師皋遣精卒二千與蠻共破吐蕃于臺登殺青海大酋乞藏遮遮臆城首悉多楊朱及論東柴等虜墜死崖谷不可計多獲牛馬鎧裝遮遮尙結贊之子虜貴將悍雄者也旣敗酋長百餘行哭

隨之悍將已亡則屯柵以次降定進檢校吏部尚書初東
蠻地二千里勝兵常數萬南倚閣羅鳳西結吐蕃徂勢強
弱爲患臯能緩服之故戰有功詔以那時爲順政王夢衝
懷化王驃侁和義王刻兩林勿鄧等印以賜之而夢衝復
與吐蕃盟臯遣別將蘇崑名之詰其叛斬于琵琶川立次
鬼主樣棄等蠻部震服乃建安夷軍于資州維制諸蠻城
龍谿于西山保納降羌九年天子城鹽州策虜且來撓襲
詔臯出師牽維之乃命大將董勗張芬分出西山靈闕破
戢和通鶴定廉城踰的博嶺遂圍維州搏棲雞攻下羊溪
等三城取劔山屯焚之南道元帥論莽熱來援與戰破其
軍進收白岸乃城鹽州詔臯休士以功爲檢校尚書右僕
射扶風縣伯于是西山羌女訶陵南水白狗連租弱水清
遠咄霸八國酋長皆因臯請入朝乃遣募府崔佐時由石

氏姓譜 卷十一

五徽 韋氏

三

門趣雲南而南詔復通石門者隋史萬歲南征道也天寶
中鮮于仲通下兵南溪道遂閉至是蠻徑北谷近吐蕃故
皋治復之由黎州出邛部直雲南置清溪闕號曰南道乃
詔臯統押近界諸蠻西山八國雲南安撫使俄進同中書
門下平章事十三年復雋州吐蕃怨完壘造舟謀擾邊臯
輒破卻之自是曩貢臘城等九節度嬰官籠官馬定德與
大將舉落皆降昆明管些蠻又內附贊普怒遂北掠靈朔
破麟州以取償焉帝詔臯深入以撓虜臯遣大將陳洎等
出三奇崔堯臣趨石門無衣山佐冕童振走維州邢玘出
黃崖畧棲雜老翁城高侗王英俊由戢和清溪道薄故松
州元膺出濕山成溪臧守至道黎雋韋良金趨平夷路惟
明自靈關夏陽攻通租偏松城王有道涉大度河陳孝陽
率蠻直那時等道西瀘攻昆明諾濟師無慮五萬以八月

悉出塞十月大破吐蕃拔其保鎮捕候追奔轉戰千里遂圍維州吐蕃釋靈朔兵使論莽熱以內大相兼東境五節度大使率雜虜十萬來救師伏以待虜乘勝深入師謀而奮虜大潰生禽莽熱獻諸朝帝悅進檢校司徒兼中書令南康郡王帝製紀功碑褒賜之順宗立詔檢校太尉會王叔文等干政臯遣劉闢來京師謁叔文曰公使私于君請盡領劍南則惟君之報不然惟君之怨叔文怒欲斬闢闢遁去臯知叔文多釁又自以大臣可與國大議卽上表請皇太子監國又上牋太子暴叔文任之姦且勸進會大臣繼請太子遂受禪因投姦姦黨是歲臯暴卒年六十一贈太師諡曰忠武臯治蜀二十一年數出師凡破吐蕃四十八萬禽殺節度都督城主籠官千五百斬首五萬餘級獲牛羊二十五萬收器械六百三十萬其功烈爲西南劇善

氏姓譜

卷七

五徵

韋氏

三

拊士至雖昏嫁皆厚資之婿給錦衣女給銀塗衣賜各萬錢死喪者稱是

韋安石京兆萬年人曾祖孝寬爲周大司空鄖國公祖津

隋大業末爲民部侍郎與元文都等留守洛拒李密戰上

東門爲密禽後王世充殺文都而津獨免密敗復歸洛世

充平高祖素與津善授諫議大夫檢校黃門侍郎雍州刺

史卒父琬仕爲成州刺史安石舉明經調乾封尉雍州長

史蘇良嗣器之永昌元年遷雍州司兵參軍良嗣當國謂

安石曰大才當大用徒勞州縣可乎薦于武后擢膳部員

外郎遷并州司馬有善政后手制勞問陟拜德鄭二州刺

史安石性方重不苟言笑具政尙清嚴吏民尊畏久視中

遷文昌右丞以鸞臺侍郎同鳳閣鸞臺平章事兼太子左

庶子仍侍讀尋知納言事時二張及武三思寵橫安石數

折辱之會侍宴殿中易之引蜀商宋霸子等博塞后前安石跪奏商等賤類不當戲殿上顧左右引出坐皆失色后以安石辭正改容慰勉鳳閣侍郎陸元方自以爲不及退告人曰韋公真宰相后嘗幸興泰宮議趨疾道安石曰此道板築所成非自然之固千金子且誠垂堂况萬乘可輕乘危哉后爲回輦長安二年同鳳閣鸞臺三品俄又知納言檢校楊州大都督府長史神龍元年罷政事俄復同三品遷中書令兼相王府長史封鄴國公賜封三百戶加特進爲侍中中宗與韋后以正月望夜幸其第賞賜不貲帝嘗幸安樂公主池主請御船安石曰御輕舟乘不測非帝王事乃止睿宗立授太子少保改封鄆國復爲侍中中書令進開府儀同三司太平公主有異謀欲引安石數因其婿唐駿邀之拒不往帝一日召安石曰朝廷傾心東宮卿

氏姓譜

卷十一

五微 韋氏

三

胡不察對曰太子仁孝天下所稱且有大功陛下今安得亡國語此必太平公主計也帝矍然曰卿勿言朕知之主竊聞乃構飛變欲誅之賴郭元振保護免遷尙書右僕射兼太子賓客同三品俄罷政事留守東都會妻薛怨婿婢笞殺之爲御史中丞楊茂謙所劾下遷蒲州刺史徙青州安石在蒲太常卿姜皎有所請拒之皎弟晦爲中丞以安石昔相中宗受遺制而宗楚客韋溫擅削相王輔政語安石無所建正諷侍御史洪子輿劾舉子輿以更赦不從監察御史郭震奏之有詔與韋嗣立趙彥昭等皆貶安石爲沔州別駕皎又奏安石護作定陵有所盜沒詔籍其贓安石歎曰祇須我死乃已發憤卒年六十四開元十七年贈蒲州刺史天寶初加贈左僕射鄆國公諡文貞

韋陟字殷卿安石子神龍二年甫十歲秀敏異常授溫王

府東閣祭酒朝散大夫風格方整善文辭書有楷法一時
名士皆與之游開元中父喪久乃調爲洛陽令宋璟歎其
盛德遺範不減其舊累除吏部郎中張九齡引爲中書舍
人遷禮部侍郎長于鑒裁故事試人惟取一日之長定爲
高下至陟許自通先試其能已乃程考舉無遺材轉吏部
選人多僞集與正調相冒陟持風采擿辨無不伏者黜正
數百員號爲公平然任法嚴或至詈詰議者訾其峻自負
門第居常簡貴傲視僚案李林甫忌之出爲襄陽太守徙
河南採訪使倚任判官員錫善訊覆支使韋元甫工書奏
時號員推韋狀俄襲父爵坐事貶守鍾離義陽歷河東太
守以失職內望頗餽謝權倖與相結納復爲楊國忠所忌
諷拾遺吳豸之劾陟饋遺事誘甥塔韋元志證之陟賭吉
溫球貶桂嶺尉不行徙平樂歲餘不出肅宗起爲吳郡太

氏姓譜

卷十一

五微

韋氏

五

守江東節度使委招諭永王表其徒季廣琛爲歷陽太守
與高適來瑊會安州齊盟質信協力勤王至鳳翔除御史
大夫欲用爲相以爭王去榮獄并按杜甫論房瑄奏雖狂
不失諫體由是見疏拜吏部尙書久之坐不禁宗人伐墓
栢貶絳州刺史遷授太常卿呂諲薦爲禮部尙書史思明
陷洛令守東都引避不許就保永樂以圖收復鬱鬱不得
志卒年六十五贈荊州大都督陟常使侍妾主牋記皆有
楷法裁答受意惟書陟名自謂若五朶雲人亦慕之號五
雲體然家法修整敕子允就學夜分課其勤惰稍怠名立
堂下不與語應對賓客必使允主之遇道義相知靡間貴
賤恒虛席側屣時以此稱永泰初贈左僕射謚忠孝
韋斌父爲相時授太子通事舍人少修整好文藝容止嚴
峭有大臣體與兄陟齊各開元中薛王業以女妻之遷秘

書丞天寶中爲中書舍人兼集賢院學士改太常少卿李
林甫構韋堅獄斌以宗累貶巴陵太守移臨汝久之驛銀
青光祿大夫列五品時陟守河東而從兄由爲右金吾衛
將軍縉爲太子少師四第同時列戟衣冠罕比者安祿山
陷洛陽斌爲賊得署以黃門侍郎憂憤卒乾元元年贈秘
書監斌天性質厚每朝會不敢離立嘆言嘗大雪在廷者
皆振裾更立斌不徙足雪甚幾至韡亦不失恭

韋況陟子也少隱王屋山孔述睿稱之及述睿以諫議大
夫名薦況爲右拾遺不拜未幾以起居郎召半歲輒棄官
去徙家龍門除司封員外郎稱疾固辭元和初授諫議大
夫勉論到職數月乞骸骨以太子左庶子致仕卒況雖世
貴而志冲遠不爲聲利所遷當時重其風操

韋叔夏安石兄也通禮家學叔父太子詹事琬嘗曰而能

氏姓譜

卷十一

五徽

韋氏

云

繼漢丞相業矣擢明經第歷太常博士高宗崩卹禮亡缺
叔夏與中書舍人賈大隱博士裴守真議定其制擢春官
員外郎武后拜洛享明堂凡所訟改皆叔夏祝欽明郭山
憚等所裁討每立一議衆咨服之累遷咸均可業后又詔
五禮儀物司禮博士有所修草須叔夏欽明等評處然後
以聞進位春官侍郎中宗復位轉太常少卿爲建立廟社
使進銀青光祿大夫累封沛郡公國子祭酒卒贈兗州都
督修文館學士諡曰文

韋抗安石從父兄子弱冠舉明經累官吏部郎中景雲初
爲永昌令輦轂繁要抗不事威刑而治前令無及者遷右
御史臺中丞邑民詣闕留不聽乃立碑著其惠開元三年
自太子左庶子爲益州大都督府長史授黃門侍郎河曲
胡康待賓叛詔持節慰撫抗于武畧非所長稱疾逼邈不

及賊而返俄代王駿爲御史大夫兼按察京畿弟拯方爲萬年令兄弟領本部時以爲榮坐薦御史非其人授安州都督改蒲州刺史入爲大理卿進刑部尚書分掌吏部選卒抗歷職以清儉不治產及終無以塋元宗聞之特給柩車贈太子少傅諡曰貞所表奉天尉梁昇卿新豐尉王鉞華原尉王燾皆爲僚屬後皆爲顯人它所辟舉如王維王縉崔殷等皆一時選云

韋元甫少修謹敏于學行初任滑州白馬尉爲政有器局以吏術知名累遷蘇州刺史浙西都團練觀察使杜鴻漸薦徵尚書左丞歷揚州長史淮南節度兼御史中丞在鎮三年政尚不擾以疾卒于位

韋應物曾祖待價祖令儀父鑿應物爲人性高潔鮮食寡欲所居荻香掃地而坐其爲詩馳驟建安已還得其風韻

氏姓譜 卷士 五徵 韋氏 七

與劉長卿顧况邱丹僧皎然往來酬唱天寶中任三衛扈從游幸永泰中歷洛陽丞京府功曹參軍大歷十四年除鄂縣櫟陽二令建中二年陞比部員外郎出刺滁與江州赴闕進左司郎中貞元初改蘇州刺史有詩十卷世稱韋蘇州

韋誥爲潤州刺史族望清華特選參軍裴寬爲婿時寬衣碧衣而長族人呼爲鶴雀誥曰愛女必以爲賢公侯妻何可以貌求人卒妻之

五代

韋建南唐袁州刺史清靜自處無所侵撓郡中大治旣去百姓思之

宋

韋謙好學能詩官至建康軍節度使子璞淳熙未仕至太

府少卿高宗崩擢司農少卿爲金國告哀使錫宴不肯用樂又不肯吉服以凶服見紹熙初除明州觀察使至清遠軍節度使致仕卒贈太尉

韋旻上林人閉門讀書無所不通鄉人以書樓目之元祐間應舉不第遂隱于羅洪洞據山林泉石之勝尤善道養之術號白雲先生

韋許字深道蕪湖人從李之儀學不事科舉築室榜曰獨樂陳了翁爲作堂記元祐間諸公遭貶逐雖素所親密亦畏禍不敢相聞許遇有過江上者必款接且周其急自號湖陰居士

韋君載字元厚春州人淳熙進士以奉議郎攝蒞廣東路提舉行業文章爲廣人所重

韋承書高宗紹興三十二年以統制官與金人戰至橫山

氏姓譜 卷十一 五徽 韋氏 六

澗大敗于世堅救之同死贈中衛大夫融州觀察使世堅亦贈三官

韋正洪武三年爲河州衛指揮使嘗言民間轉輸甚勞而布茶可以易粟以茶布給軍士令自相貿易庶省四民之勞詔從之正初至衛城邑空虛乃日夜撫循其民河州遂爲樂土朝廷嘗賜璽書勞之

韋斌字彥質太河衛人舉進士授給事中典會試文衛擢廣東提學副使改福建藻鑑精明嘗曰糊名易書以我試人填名揭案以人試我庸高下其手邪

韋清景泰初知寧化縣清廉勤慎植弱抑強勞于撫字未三載卒于官民哀慕之不置

韋濟成化初任龍巖知縣宅心正大才識通敏措置經營

悉合程度汀寇發鄰境皆受其害龍巖賴濟以全既去人久而益思之

韋昭字通顯宜山人登永樂辛丑進士以文學選翰林檢討擢大理寺副乞歸隱居躬耕自給絕跡城市有司時往候之昭自田中簑笠跣足而歸始盥洗整衣冠出具蔬飯雞酒談笑竟日綽有古風

韋鑿字君用橫州人宏治乙卯鄉薦歷大庾秀水訓導陞寧鄉令愛民育士恤獄緩刑民間謠頌之致政歸民不忍舍歸祀鄉賢

韋廣宜山人宣德二年進士爲御史以廉稱罷官鄉居有故人按部至郡廣方漁于江故人猝至前導問廣曰韋御史家安在廣指曰前村是也騶從既過乃登岸疾走從後入衣袍出肅客故人曰公何熱汗流如此廣曰適在近村

氏姓譜

卷十一

五微

韋氏

元

聞公至疾歸走故耳左右竊曰好似江中打漁人廣聞之言笑如故

韋商臣字希尹長興人嘉靖二年進士授大理評事明年冬商臣以大禮初定廷臣下吏貶謫者無虛日乃上疏曰臣所居官以平獄爲職乃自授任以來竊見羣臣以議禮忤旨者多人此皆不平之甚上干天象下駭衆心臣竊以爲皆所當宥况比者水旱疫癘星隕地震山崩泉湧風雹蝗蝻之害殆徧天下有識莫不寒心及今平反庶獄復成者之官錄死者之後釋逮繫者之囚正告評者之罪亦弭災禳患之一道也帝責以沽名賣直謫清江丞量移德安推官遷河南僉事討平永寧巨寇以功受賞伊王虐殺其妃商臣論如律嘗治里居給事中杜桐殺人罪桐構之吏部尙書汪鉉甫遷四川參議遂以考察落職歸言官薛宗

鎧戚賢戴鏡輩交章救不納家居數十年卒

韋宗孝嵩明州吏目萬歷三十五年賊陷州宗孝出禦而敗閣門死之贈本州同知廕子入國學

韋昉蜀人夜泊涪陵江忽遇龍女遺騎迎入宮後昉登第十年知簡州龍女復遣書相迎敕命昉充北海水仙

歷代列女

韋賢妃德宗妃戚里舊族也祖濯尚定安公主初爲良姊德宗貞元四年冊拜賢妃宮壺事無不聽而性敏淑言動皆有繩矩帝寵重之後宮莫不師其行帝崩自表留奉崇陵園元和四年薨

韋氏士族女王琳妻也自幼不好華飾琳爲眉州司功參軍卒韋時年二十五其家欲強嫁之韋固拒自是不聽音樂獨處一室家貧或終日不食手著女訓卒年七十五二

氏姓譜

卷十一

五徽 韋氏

三

子堅冰教育有法後皆名聞

韋氏溫之女也能屬文歸薛蒙續曹大家女訓行于世

韋氏字桃符京兆韋袞之奴也每征討將行有膽力袞至左衛中郎以桃符久從驅使乃放從良符家有黃牯牛宰而獻之因問袞乞姓袞曰止從我姓爲韋氏符叩頭曰不敢與郎若同姓袞曰汝但從之此有深意故至今爲黃牯子韋卽韋庶人其後也不許異姓者蓋慮年深代遠子孫或與韋氏通婚此其意也

歸氏

望出京兆通志云姓也未詳得姓之始左傳胡子圍姓歸爲楚所滅子孫或以國爲氏或以姓爲氏以姓爲氏者世居吳郡

歷代名賢

歸崇敬字正禮蘇州吳人治禮家學多識容典擢明經遭
父喪孝聞鄉里調國子直講天寶中舉博通墳典科對策
第一遷四門博士有詔舉才可宰百里者復策高等授左
拾遺肅宗次靈武再遷起居郎贊善大夫史館修撰兼集
賢殿校理修國史儀注以貧求解歷同州長史潤州別駕
未幾有事橋陵建陵名還參掌儀典改主客員外郎復兼
修撰代宗幸陝名問得失崇敬極陳生人疲敝當以儉化
天下則國富而兵可用時百官朝朔望皆服袴褶崇敬非
之建言三代速漢無其制隋以來始有服者事不稽古宜
停詔可大歷初授倉部郎中充帛祭冊立新羅使海道風
濤舟幾壞眾驚謀以單舸載而免答曰今共舟數十百人
我何忍獨濟哉少選風息先是使外國多齎金帛貨舉所

氏姓譜

卷十一

五徵 歸氏

三

無崇敬囊窶惟衾衣東夷傳其清德還授國子司業兼集
賢學士八年遣祀衡山未至而哥舒晃亂廣州監察御史
憚之請望祀而還崇敬正色曰君命豈有畏邪遂往皇太
子欲臨國學行齒冑禮崇敬以學與禮名皆不正乃建條
議後坐史給稟錢不實貶饒州司馬德宗立名還復拜國
子司業稍遷翰林學士左散騎常侍充皇太子侍讀又兼
晉王元帥參謀封餘姚郡公田悅李納稟命持節宣慰稱
旨表歸上冢寵賜繒帛儒生以為榮遷工部尚書仍前職
年老以兵部尚書致仕卒年八十八贈尚書左僕射論曰
宣論撰數十篇

歸登字冲之崇敬子事繼母篤孝大歷中舉孝廉高第貞
元初策賢良為右拾遺裴延齡得幸德宗欲遂以相右補
闕熊執易疏論之以示登登動容曰願蠶吾各雷霆之下

君難獨處故同列有所諫正輒聯署無所回諱轉右補闕
起居舍人凡十五年僚類有出其下而進趨自喜得顯官
惟登與右拾遺蔣武退然遠權勢終不以淹晚槩懷遷兵
部員外郎順宗爲皇太子登父子侍讀及卽位以東宮恩
趨拜給事中遷工部侍郎復爲皇太子諸王侍讀獻龍樓
箴以諷徙左散騎常侍入謝憲宗問政所先登知帝睿而
果于斷勸順納諫爭內外傳爲讜言後判國子祭酒事進
工部尚書累封長洲縣男卒年六十七贈太子少師諡曰
憲登性溫恕家僮爲馬所蹠笞折馬足登知不加責有遺
金石不死藥者紿曰已嘗及登服幾死訊之乃未之嘗人
皆爲怒而登不爲愠嘗慕陸象先爲人世亦許其類云
歸融字章之登子元和中和及進士第累遷左拾遺事文宗
爲翰林學士進至戶部侍郎開成初拜御史中丞湖南觀

氏姓譜

卷七

五微 歸氏

三

察使盧周仁以南方屢火取羨錢億萬進京師融劾奏天
下一家中外之財皆陛下府庫周仁陳小利假異端公違
詔書徇私希恩恐海內效之因緣漁刻生人受弊罪始周
仁請重責還所進貸貧民租入詔不從置錢河陰院以虞
水旱初戶部員外郎盧元中左司員外郎判戶部案姚康
受平糶官秦季元絹六千匹貸乾沒錢八千萬俱貶嶺南
尉數年金部員外郎韓益判度支子弟受賕三百萬未入
者半帝問融益所犯與盧元中姚康孰甚對曰元中等枉
失庫錢益所坐子弟受賄事異法輕故益止貶梧州參軍
融遷京兆尹李固言爲相惡之徙秘書監固言罷擢權知
兵部侍郎歲間出爲山南西道節度使徙東川還歷兵部
尚書累封晉陵郡公會昌後儒臣少朝廷禮典多本融議
辭疾以太子少傅分司東都太中七年卒贈尚書左僕射

歸瑋賈歷間爲餘杭令因漢陳渾故迹置上下湖溉田千頃又築甬道通西北大路高廣徑直百餘里行旅無山水之患

元

歸暘字彥溫汴梁人將生時母楊氏夢朝日出東山上有輕雲來掩故名暘學無師傅而精敏過人文宗至順元年成進士同知潁州事鉏奸擊強人不敢以年少易之順帝至元五年祀人范孟謀不軌許爲詔使至河南殺行省官屬使暘北守黃河口暘拒不從賊怒繫之獄及賊敗汴賊者皆獲罪暘獨免同里有吳炳者常以翰林待制徵不起賊召炳司卯酉歷炳懼不敢辭時人爲之語曰歸暘出角吳炳無光自此名譽大著明年拜監察御史入謝臺臣奏曰此卽河南抗賊不屈者帝曰好事卿宜數爲之賜以上

氏姓譜

卷七

五徵

歸氏

三

尊已而辭官歸養親汴上至正七年除右司都事順江渠長樂孫求內附請立宣撫司及置郡縣一十三處省臣將許之暘曰古人有言鞭雖長不及馬腹果設郡縣有事不救則辜來附之誠救之則疲中國而事遠畧所謂獲虛名而受實禍也與左丞呂思誠抗辨甚力丞相太平笑曰歸都事善戇何相抗乃爾究策將安出暘曰可授渠長宣撫職勿責其貢賦使者賜以金帛遣歸足矣遂從其言明年轉參議樞密院事時方國珍未附江浙參政朶兒只班致討師潰被執將加之罪暘曰將之失利其罪固當然所部皆北方步騎不習水戰是驅之死地耳宜募濱海民善水性者禽之旣而國珍遣人從朶兒只班走京師請降暘曰國珍已敗我王師又拘我王臣力屈而來非真降也必討之以令四方時朝廷方事姑息後果屢叛如暘言九年改

禮部尚書會開端本堂皇太子就學名賜爲贊善賜言師
傳當與皇太子東西相向授書其屬亦以次列坐止虛中
位以待至尊臨幸否則師道不立矣時羣臣言人人殊卒
從賜議俄以疾辭三遷皆不起使者敦迫始輿疾至京師
以集賢學士致仕給半俸終身辭不受間闕避兵至解州
夏縣居焉皇太子出冀寧強起之居數月復還卒于夏縣
先是賜在上都時脫脫自甘肅還且入相中書參議趙期
頤員外郎李稷渴賜私第授脫脫命屬草詔辭曰丞相將
爲伊周事業當命詞臣視草今屬筆于賜恐累丞相之賢
也期頤曰若帝命爲之奈何賜曰事理非順亦當固辭期
頤知不可屈乃已

歸有光字熙甫崑山人九歲能屬文弱冠盡通五經三史

氏姓譜

卷上

五微

歸氏

三

諸書師事同邑魏校嘉靖十九年舉鄉試八上春官不第
徙居嘉定安亭江上讀書談道學徒常數百人稱爲震川
先生四十四年始成進士授長興知縣用古教化爲治每
聽訟引婦女兒童案前刺刺作吳語斷訖遣去不具獄大
吏令不便輒寢閣不行有所擊斷直行已意大吏多惡之
調順德通判專轄馬政明世進士爲令無遷倖者名爲遷
實重抑之也隆慶四年大學士高拱趙貞吉雅知有光引
爲南京太僕丞留掌內閣制敕房修世宗實錄卒官有光
爲古文原本經術好太史公書得其神理時王世貞主盟
文壇有光力相舐排目爲妄庸巨子世貞大恨其後亦心
折有光爲之讚曰千載有公繼韓歐陽余豈異趨久而自
傷其推重如此

歸有正字養素父一齋六十一歲乃生體最尪弱絕憐之

日授以經輒成誦素不禮于長兄一日試以四題頃刻立就文理可觀兄不覺嗟嘆兄將死將腴產盡讓之族人歎美震川尤稱之年十八爲人師二十父喪哀毀自是有嘔血之病年九十預知死期無疾終

歸子慕字季思有光少子也舉萬歷十九年鄉試再被放卽屏居江村與無錫高攀龍最善其沒也巡按御史郝彪佳請于朝贈翰林待詔有光制舉義湛深經術卓然成大

家後德清胡友信與齊名世稱歸胡

歸昌世字文休有光孫十歲能爲詩歌稍長有聲詞苑與李流芳吳志堅稱三才子

歸叔度崑山人爲人敦厚謹恪洪武初避事挈妻子之蜀崎嶇跋涉至某州忽遇山神陰相指示前引數千里巉巖翠峯幻爲坦境不信宿而達之蜀人見問亦相詫駭居成

氏姓譜

卷十一

五微

歸氏

三五

都二十餘年始還鄉年九十二尙強力善飯每與人追逐舊事輒歔歔泣下然神人救援蓋以平日誠實感之也歸鉞字汝威嘉定縣人早喪母父娶繼妻有子鉞遂失愛父偶撻鉞繼母輒索大杖與之曰毋傷乃翁力也家貧食不足每炊將熟卽譏數鉞過父怒而逐之其母子得飽食鉞飢困匍匐道中比歸父母相與言曰有子不居家在

外作賊耳輒復杖之屢瀕于死及父卒母益擯不納困販鹽市中時私其弟問母飲食致甘鮮焉正德三年大飢母不能自活鉞涕泣奉迎母內自慚不欲往然以無所資迄從之鉞得食先母弟而已有飢色弟尋卒鉞養母終其身嘉靖中卒族子繡亦飯鹽與二弟絨繡友愛繡數犯法繡輒罄貲護之終無愠色繡妻朱製衣必三襲曰二叔無室豈可使郎君獨暖邪里人稱爲歸氏二孝子

肥氏

通志云恐其先有封于肥鄉者戰國策趙賢人肥義之後風俗通云漢有肥節按急就篇云肥氏北狄國名

歷代名賢

同

肥義趙之貴臣事肅侯肅侯薨武靈王少及聽政問肥義加其秩國三老年八月致其禮武靈王二十七年立子何爲王是爲惠文王肥義爲相國傳武靈王自號爲主父惠文王三年封長子章爲代安陽君使田不禮相章李兌謂肥義曰公子章彊壯而志驕黨衆而欲大殆有私乎田不禮之爲人也忍殺而驕二人相得必有謀陰賊起夫小人欲輕慮淺謀徒見其利而不顧其害同類相推俱入禍門以吾觀之必不久矣子任重而勢大亂之始禍之所

氏姓譜

卷十

五徽

肥氏

三

集也子必先患子奚不稱疾毋出傳政于公子成毋爲怨府毋爲禍梯義曰不可昔者主父以王屬義也曰毋變而度毋異而慮堅守一心以沒而世義再拜受命而籍之今畏不禮之難而忘吾籍變孰大焉進受嚴命退而不全負孰甚焉變負之臣不容于刑且夫貞臣也難至而節見忠臣也累至而行明子則有賜而忠我矣雖然吾不敢失也兌曰諾子勉之吾見于已今年耳涕泣而出兌數見公子成以備田不禮之事異日肥義謂信期曰公子與田不禮堪可憂也其于義也聲善而實惡此爲人也不于不臣吾聞之姦臣在朝國之殘也讒臣在中主之靈也此人貪而欲大內得主而外爲暴矯令爲慢以擅一旦之命不難爲也禍且逮國吾憂之夜而忘寐盜賊出入不可不備自今有名王者必見吾面我將以身當之信期曰善哉吾得聞

此也四年安陽君來朝主父及王游沙邱異宮章與田不禮作亂詐以主父令名王義先入殺之

漢

肥親仁恕椽袁安使廉魯恭共以實聞恭遂馳名

衣氏

見姓苑中庸注齊人言殷聲如衣今姓有衣者殷之胄與

歷代名賢

明

衣勉仁棲霞人萬歷間陝西涼州衛經歷

衣祐鰲山人華亭丞

歷代列女

衣氏汴梁儒士孟志剛妻貧而無子夫卒有司給以棺木

氏姓譜

卷十

五微

衣氏至 三

衣給匠者曰可寬大其棺吾夫有遺書欲盡置其中匠者然之是夕氏具雞黍祭其夫家之所有悉散之隣里及同居王媪曰吾聞一馬不被兩鞍吾夫既死與之同棺其穴可也遂自到

希氏

三輔決錄希海字子江又有希卑

歷代名賢

宋

希昔儀隴人嘉慶進士

希德儀隴人嘉慶進士

希績字紀常儀真人神宗元豐間為淮南發運副使行已

有堅操坐元祐黨

非氏

柏翳之後有非子漢有大司農非調

賁氏

見通志音肥風俗通秦非子之後漢功臣表賁赫告黥布反封期思侯

歷代名賢

漢

賁麗成帝時熒惑守心丞相翟方進憂不知所在有郎賁麗善占星言大臣宜當之上名見方進令審處方進即日自殺

明

賁勝膠州人宣德間建寧千戶

賁智滁州人宣德中大名府學教授

飛氏

氏姓譜

卷十一

五微

飛氏至 三

商有飛廉顓頊之後

歷代名賢

宋

飛繁浚義人朝奉郎

明

飛瀑城固人永樂間戶部郎中

威氏

媯姓風俗通云齊威王之後以為田氏始王故其後以為氏今望出南安新序湯學乎威子伯

揮氏

牛坤切見纂要

幾氏

風俗通宋大夫似幾之後以王父字為氏

畿氏

後魏官氏志侯畿氏改為畿氏

旌氏

見氏族志

依氏

國語黃帝之子十四姓有依氏

稀氏見姓苑

氏姓譜

卷十一

五徵 畿氏至 完

氏姓譜卷十一終

